

IOHANNIS MVSAEI,

DOCTORIS THEOLOGI ET PROFESSORIS IN ACAD. IENENSI  
QVONDAM CELEBERRIMI,

COMMENTATIO

DE

CONSANGVINITATE  
ET AFFINITATE,

IN CAP. XVIII. LEVITICI.

Oder:

Von der Bluts = Freundschaft  
und Schwägerschaft.


EX RECENSIONE

IMMANVELIS PROELEI,

ET CVM EIVS PRAEFATIONE

DE

FVNDAMENTIS DISPENSATIO-  
NVM IN CAUSA MATRIMONIALI.




IENAE, APVD IO. FRIDERICVM RITTERVM,  
M DCC XXXIV.



58700 (19)







# LECTORI BENEVOLO

S. P. D.

IMMANVEL PROELEVVS.

---

## §. I.



Es matrimoniales, in quas Princeps & magistratus civilis dispensationum jura exercet, fori sunt mixti, & apud Christianos non solum secundum leges naturales & hinc deductas civiles & politicas, verum etiam juxta leges divinas & ad scripturæ sacræ normam sunt ordinandæ. Antequam ergo de fundamentis differamus, ex quibus constet quomodo dispensatio circa matrimonialia in foro humano locum obtineat, consultum est nonnulla præmittere, de *conjugii natura*, quod secundum scripturæ sacræ præscriptum contrahitur. Deinde quædam etiam præfabimur de *dispensationum* natura & indole, ut his explicatis tanto facilius fundamenta dispensationum in rebus matrimonialibus intelligantur.

## §. II.

Quoniam actiones humanæ honestæ aut inhonestæ, justæ aut injustæ dici aliter non possunt, nisi qua-



tenus cum praescripta lege norma aut regula conveniunt vel ab hac discrepant, hinc matrimonii honestas aut turpitudine aliter cognosci nequit, quam si consideretur an ejusdem indoles aut natura praescriptis legibus respondeat. Inprimis quando ab aliquo ineundum est conjugium, videndum maxime est ne contra statutam legem peccetur.

### §. III.

Leges & regulæ secundum quas vivendum est homini, sunt vel *Rationis*, vel *Magistratus*, vel *Christianæ*. Lex rationis vocatur alias *lex naturalis*, ubi nemo superiorem agnoscit in statu Naturæ præter dictamen rationis, quod a Deo proficiscitur, cujus voluntati quisque obedire tenetur. Lex Magistratus vocatur alias *lex civilis*, quoniam in certa quadam civitate a Principe aut qui rebus publicis præest fertur, & contradistinguitur legi rationis, quia hæc nimis generalis & veluti abstracta est, lex autem civilis specialior ad reipublicæ statum & indolentem accommodatur, ac proinde plerumque de casibus singularibus, aut quæ frequenter usu venire solent, sancitur. In quibus ferendis non modo rationis lumen adhibendum est, sed præter hoc inprimis etiam attendendum, quid subditis & hominibus in ista republica viventibus conducat ipsorumque commoda promovere possit. Leges Christianæ appellantur, quæ in sacro codice hominibus Christi doctrinam amplexantibus datae sunt, ut secundum has vitam non modo rationalem & civiliter bonam, verum etiam sanctam instituunt. Et quoniam hæ doctrinæ rationem & decreta magistratus superant, hinc peculiariter *revelatae* dici solent, & religionis Christianæ partem constituunt.

### §. IV.



## §. IV.

Initur ergo matrimonium 1. in Statu naturali secundum *legem rationis*, 2. in Statu civili, secundum *leges reipublicae* a Principe latas. 3. In Religione Christiana, secundum *doctrinam scripturae sacrae & praecepta Christi*. Jam itaque videndum est, quid in diversis hisce statibus, ad matrimonii honestatem observandum sit, *Homini, Civi, & Christiano*. Ex quibus deinceps facile clarescet, quænam dispensationum fundamenta sint, & quatenus in re matrimoniali dispensare liceat.

## §. V.

In rebus moralibus secundum naturæ ductum, actionum natura & indoles optime ex fine & agentis intentione cognoscitur. Itaque qui matrimonium in Statu Naturali secundum dictamen rationis contrahit, tria potissimum intendit 1.) ut sobolem sibi quærat. 2.) Ut consuetudine & auxilio alterius perfruatur. 3.) Ut adversus stimulos venereos & vagam libidinem remedium habeat. Ex his finibus primus quidem videtur esse præcipuus & maxime necessarius. Secundus non cujusvis naturæ inclinationi proprius est, aliisque subsidiis obtineri potest. Tertius naturæ corruptæ quidem admodum agnatus, non tamen omnino homini necessitate naturæ perpetuus est, & qui rationem excoluere virtutibus, ab eodem abhorrent.

## §. VI.

Ex quibus videre licet, quod ad honestatem matrimonii in statu naturæ contrahendum nihil amplius essentialiter requiratur, quam ut vir cum foemina, aut foemina cum viro cohabitaret vel ad Sobolem quærendam, vel ad consuetudinem aut mutuam adjutorium, vel denique ad restringendos libidinum stimu-



los. Qui tamen finis ultimus repugnare rectæ rationi videtur, nisi sobolis generandæ intentio adsit. Plura ratio sibi relicta circa matrimonium necessaria esse non cognoscit. Licet enim aliqua sint, quæ si observentur ab aliquo in societate conjugali, ad laudem ipsi cedant, tanquam necessaria tamen ab homine naturali ex rationis præceptis exigere nequeunt. Ex horum numero est, ut quis *perpetuo* cohabitaret cum fœmina, quam semel in matrimonium ascivit. Præceptis enim moralibus & rationi conforme est, ut si quispiam recte cum quodam amicitiam honestam iniit, eandem perpetuo & sine divortio fervet, secundum illud, ea amicitia quæ desinere potest vera nunquam fuit. In conjugio autem summa amicitiae ratio conspici debebat, adeoque esse ipsam quoque oportebat inviolabilem. Verum ideo non peccare in statu naturali dicendus statim est, qui per nonnulla tempora, uti per anni aut plurium annorum spatium, fœminam vel virum in societatem conjugalem adsciscit, qua tempore elapso ac obtento sine suo eandem iterum solvit. Quoniam perpetuitas in statu naturali conjugio de virtute est, de justitia non est, quasi injustus aut flagitiosus sit, qui contra faceret. Hujus enim rei ex ratione sibi relicta ratio solida reddi nequit.

## §. VII.

Sed in *statu civili* nonnulla Princeps hisce simplicioribus præceptis naturalibus circa res matrimoniales addere potest ex usu reipublicæ suæ. Est autem Princeps vel *Christianus* vel *Gentilis*, sed quoniam adhuc dantur religiones aliæ uti Mahumedana, Judaica &c. dicemus potius, quod Princeps sequatur vel *Revelationem* supernaturalem sive veram sive falsam, vel *Rationem* solam.



solam. Princeps *Revelationem* supernaturalem sequens (quo pertinet Princeps Christianus) tenetur matrimonio leges eas sequi & in sua republica observare, atque aliis observanda praestituere, quæ a Deo atque in sacris literis præcipiuntur, de quibus mox plura dicturi sumus §§. sequentibus. Princeps autem *solam rationem* sequens, ea circa matrimonialia adicere naturalibus præceptis potest, quæ pro statu suæ civitatis ad salutem & commodum subditorum atque suum maxime conducunt, quæ quoniam varia esse possunt, in præsentī non commemoramus. Exemplo apud nos est publica eaque trina proclamatio, copulatio per Ministros Ecclesiæ, quam *Dn. Becmannus*, ipsis tanquam Magistratum representantibus, ab imperante concessam esse docet, quod etiam exemplo Reipublicæ Batavorum videre licet.

## §. VIII.

Quoniam vero plerique Principes in Europa *Christianismum* profitentur adeoque ex Religionis Christianæ dictatis res matrimoniales moderari tenentur, hinc considerandum præcipue est, quod circa negotium matrimoniale tenendum sit, si *Christianus* secundum sacræ scripturæ præcepta matrimonium inire voluerit. Illud certum est, scripturam & Christi doctrinam, approbare illos tres fines conjugii quos ex sana ratione adduximus §. 5. & 6. Nam 1) de procreanda per conjugium sobole legitur *Genes. cap. I. v. 28. (a) crescite & multiplicate & replete terram*, 2) de mutuo auxilio invicem præstando legitur *Genes. cap. II. v. 18. Non est bonum hominem esse solum,*

---

(a) *Iunius & Tremellius* voces Hebræas *פרו ורבו* verterunt *fecundificate & augefcite* & legi hic utiliter possunt, quæ habet *Seldenus J. N. & Gent. juxta disciplinam Ebræorum lib. V. c. 3. p. 565.*



*lum, faciam ei auxilium commodum ipsi* (quod quidem nonnulli de auxilio ad generandum explicant) 3) de restinguenda libidine legitur. *1. Cor. VII, 2. & 9. Propter scortationem, suam quisque uxorem habeto, & proprium quavis virum habeto. Qui se non continent, matrimonium contrahant, nam melius est matrimonium contrahere, quam uri.*

## §. IX.

Verum his ipsis præceptis naturalibus nonnulla superaddidit divina sapientia in sacris literis. Quorum præcipua sunt hæc 1) ut matrimonium sit perpetuum, & regulariter (Adulterium enim, & malitiosa desertio contra conjugii regulas committuntur) non nisi morte dissolvatur. *1. Cor. VII. 39. Uxor alligata est marito, quamdiu vivit maritus Rom. VII, 2. Genes. II, 24. Matth. XIX, 6. 9.* 2) Ut cum una fœmina, & uno mare contrahatur. *Genes. I, 27. II, 24. Matth. XIX, 4. 5. 9.* 3) Ne cum persona nimia consanguinitate & affinitate alicui conjuncta inëatur. Quo pertinent leges de incestu *Levit. XVIII, 16. sqq.* Quæ uberrimam eruditæ Theologis pariter & Jureconsultis disceptandi materiam dedere. Quo de nonnulla infra dicentur.

## §. X.

Hæc de contrahendo matrimonio, secundum leges naturales, civiles & sacras sive Christianas. De dispensatione nunc monendum est, quod per dispensationem intelligenda sit, *relaxatio juris debiti, alicui præ cæteris facta, manente lege, scilicet quando is, qui in legem latam habet potestatem, vim obligandi alicui remittit, qui ista lege omnes stringente tenebatur.* Quo pertinet, cum Princeps nonnullas merces generatim vendere lege vetuit, interim easdem vendendi potestatem alicui per privilegium concedit. Aut si quando in duellum proruere universis



versis interdictum est, Princeps tamen uni concedit licentiam alterum in duellum provocandi.

## §. XI.

Et distinguenda omnino est dextra *legis interpretationis* sive æquitas a dispensatione. Quare cum nonnulli Jureconsulti concedunt, ut quis in uxorem ducere possit defunctæ uxoris sororis filiam. Vid. *Richter Decis. II. n. 13. sq. part. II. Cons. 18. Struv. Jurispr. Rom. Germ. l. 1. tit. 6. §. 17.* Hoc non proprie dispensatio, sed dextra tantum, uti & ipsi opinantur legis divinæ interpretatio secundum æquitatem dicenda est. Nam ex horum mente prohibitio *Lev. XVIII. & XX.* ad unicum tantum casum ibidem vetitum & expresse denominatum restringitur. Hinc dum mens legislatoris non fuit, casum hunc prohibere, quod secundum ipsorum explicationem verum putant, proprie non dispensant circa hanc rem, sed tantum explicant, quod Deus hunc casum quem permittunt in contrahendo matrimonio prohibere noluerit. Sic etiam dum Christus *Marci II, 24. 25. 27. 28.* permisit, ut discipuli vellicarent aristas tempore Sabbathi, proprie non dispensavit, sed tantum dextre explicavit mentem legis divinæ, quæ tempore necessitatis nunquam vellicare aristas etiam die Sabbathi prohibuit. Id quod exemplo Davidis ex *1. Sam. XXI, 6.* illustratur.

## §. XII.

Hinc cum anno 1595. Judæus quidam Nathan dictus Hildesiæ matrimonium cum defunctæ uxoris sorore iniret, & cum *Dan. Hofmannus*, Theologus Helmstädiensis demonstrare conaretur, ejusmodi nuptias, quæ in primo hoc affinitatis gradu contrahuntur, nec jure divino nec naturali repugnare, adeoque Magistratum tale matrimonium concedere posse affirmaret, de quo videatur



deatur *Gerhardi* iudicium apud *Dedekennum Consilior. Vol. III. p. 250.* proprie non hoc volebat, quod Magistratus hoc in casu dispensare, id est suspendere legis divinæ vim posset, sed potius contendebat de dextra interpretatione *vers. 18. Cap. XVIII. Levitici*, an nimirum verbis istis, *mulierem ad sororem ne assumito ad affligendam eam in vita ipsius* vetitum sit uxoris sororem ducere, postquam uxor satis concessisset, an vero nuptiæ prohibeantur cum sorore uxoris solum quamdiu vivit.

### §. XIII.

Quanquam vero differentia omnino observanda sit inter dispensare & legum latam recte explicare, uti mox ostendemus, usu tamen obtinuit, ut dispensare nonnunquam dicatur magistratus, ubi accurate loquendo nuda tantum legis latae explicatio aut permissio locum habere potest. Hinc Princeps dispensare dicitur, ubi res dubia quædam prima vice dijudicanda incidit, de qua nondum lex lata aut decretum extat. Cum tamen proprie omnis dispensatio decretum aut legem obligantem prærequirat. Quare si Magistratus secundum *Beza & Hemmingii* sententiam alicui concedat, fratris sui defuncti sponsam ducere, quia ex ipsorum mente mulier non pertinet ad matrimonium, cum qua commixtio sexus facta non est, in quo tamen casu dissentit *Facultas Theologica Rostochiensis*, non dispensasse hac in re, sed declarasse aut explicasse tantum mentem suam dici debet.

### §. XIV.

Inter dispensationem enim & declarationem sive legis rectam explicationem triplex intercedit differentia. Nam 1) Dispensatio semper fieri debet a superiore & qui legem latam abrogandi potestatem habet, sed explic-



plicare legem quisque inferior potest, qui legis rectum intellectum habet. 2) Dispensatio relaxat obligationem, sed declaratio aut interpretatio ut plurimum ostendit legem non obligare. Itaque dispensatio locum habet, quando lex viget & adstringit, declaratio vero solet addi, quando legem non obligare ostenditur. 3) Dispensatio postulat, ut circumstantiæ rei persistant sub quibus lex obligabat, verum declaratio necessaria est, ubi circumstantiæ mutatae sunt. Itaque hodie portas civitatum transcendentium poena non est capitalis, quemadmodum apud Romanos, sed arbitraria. Vid. *Berlich. Decis. 70.* Quoniam legis circumstantias mutatas esse constat. Nec capitali supplicio afficiendus est Sabbathum profanans, uti *Num. XV, 35.* tempore Veteris Testamenti factum est, adeoque declaratio, non autem dispensatio his in casibus hodie locum habet.

## §. XV.

Superioribus perspectis fundamenta dispensationum haud difficulter intelligi possunt. Dispensationis enim præcipuum & fere unicum est fundamentum *potestas legislatoris ejusque a superiore independentia*, adeoque is dispensare circa legem potest, qui legis conditæ auctor est, eamque abrogare potest. Ex quo sequitur, quod magistratus inferior circa legem a superiore aut Principe latam dispensare nequeat. Neque etiam Rex aut Princeps summus circa leges a DEO latas dispensandi potestatem habet. Ratio est, quoniam inferior qui a superiore dependet, in voluntatem sui superioris nullum jus habet. Voluntas autem superioris lex est inferiori. Quousque igitur firma est superioritas Imperantis, eo usque dispensare præter ipsum circa legem a se latam nemo potest.



## §. XVI.

Evidens itaque est summum Imperantem dispensare non posse 1) *circa leges naturales*, & quæ ex liquido naturæ lumine proficiscuntur. - Nam leges naturales continent voluntatem Dei quatenus per rectam rationem cognosci potest. Voluntati autem Dei liquidæ cognito ab omnibus obedientia debetur. Itaque si imperans dispensare vellet circa præceptum naturæ, ut quis impune innocentem occideret, ipsi injurias inferret, crimina committeret, similiaque, fieret hoc inde, quod vel Deum non agnosceret, vel Deum legis naturalis autorem existere negaret, quod utrumque in hominem ratione utentem cadere nequit. 2) Nec Princeps dispensare potest circa leges divinas *ex revelatione supernaturali cognitæ* quæ in sacris literis extant. Quoniam per revelationem voluntas divina nobis innotescit, cui parendum est. Et si quid dubitationis circa leges divinas in Scriptura S. propositas superest, illud non tam dispensationem proprie dictam, sed tantum interpretationem revelationis concernit, uti mox pluribus monabitur.

## §. XVII.

Neque enim quisquam eo impietatis aut vecordiae facile processit, ut dispensare se proprie posse diceret circa leges a Deo homini præscriptas & evidenter cognitæ, sic enim ipsi Deo superiorem se faceret. Et quanquam hoc Pontificibus Romanis vulgo tribui soleat, saniores tamen ex ipsis Pontificiis illud omni studio ab iisdem remove allaborant. Vid. *Georgii Sayri Clavis Regia Sacerdotum l. 6. cap. II. §. 16.* Quinimo *Becanus in Manual. Controvers. l. 1. c. 6. §. 46.* cum ipsi objectum esset a Povello, Papam dispensare contra legem Veteris & No-



& Novi Testamenti, respondet, hanc objectionem constare meris mendaciis, eandemque in Opusculo de *Anti-Christo Reformato* cap. 6. Oper. tom. II. p. 953. probari non posse dicit, nisi mendaciis, calumniis & similibus portentis. Quæ vehementius dicta suo loco linquimus, addimus vero quod & ipse *Becanus Theol. Scholast. tr. III. c. 6. Concl. 3.* Pontificem peccare affirmet, quando cum aliquo dispenset ut possit omittere horas canonicas, ipsum etiam, qui hac dispensatione utitur, peccare.

## §. XVIII.

Diximus §. 15. inferiorem dispensare non posse contra legem a superiore latam. Ubi tamen limitatio quædam annectenda est. Nonnunquam enim inferior dispensare circa legem superioris potest, & quidem duplici ex causa. 1.) Quando inferior superioris consensum tacitum habet, quod fit cum consuetudo contra legem latam invaluit sciente & permittente superiore. 2.) Quando inferior superioris consensum expressum habet, uti quando ex potestate delegata dispensat iudex inferior aut minister. Verum si accurate rem examinare velimus, hisce in casibus inferior non dispensat contra legem superioris, sed tanquam interpret superioris, præsumptam ejus voluntatem tantum proponit aut exequitur.

## §. XIX.

Jam quando ad dispensationes in causis matrimonialibus accedimus, primo nobis quidem considerandum est, an Princeps sit *Ethnicus*; an vero *Christianus*, vid §. 7. Princeps ethnicus quia rationem sibi relictam solum sequitur, & revelatione supernaturali destituitur, dispensare in omnibus circa matrimonialia vi sui imperii & superioritatis potest, quæ ratio recta non inho-



nesta aut injusta dictitat. Quoniam enim Princeps gentilis nullum superiorem habet præter Deum, Dei autem voluntas ipsi non aliter innotescere potest, quam per rationem naturalem, hinc contra rationis dictamen dispensare nequit. Quo pertinet *Modestini* dictum l. 42. ff. de ritu Nupt. Semper in conjunctionibus non solum quid liceat considerandum est, sed quid honestum sit. Conf. §. 5. 6. 7. Itaque si per rationem sibi relictam evidenter demonstrari potest, Polygamiam aut incestum sive nimiam sanguinis propinquitatem ex consanguinitate & affinitate ortam, repugnare dictamini rationis rectæ & per consequens voluntati Dei Princeps etiam Ethnicus permittere Polygamiam aut dispensare de incestis nuptiis non potest. At contra si ex lumine rationis solo ostendi turpitudine incestus aut polygamiae nequit, Princeps Ethnicus, qui revelatione supernaturali & sacra scriptura destituitur, si permittere & dispensare circa has causas ausit, videtur id egisse, in quo ideo culpam vix potest. Nisi id monere velis, incubuisse ipse inquisitionem in voluntatem revelatam numinis, cujus neglectus excusabilis non censetur. Par in reliquis circa matrimonialia ratio est.

## §. XX.

Verum Princeps aut Magistratus *Christianus*, quoniam voluntatem Dei agnoscit sibi patefactam, & præscriptam per revelationem in sacris litteris habet, obstrictus omnino est hisce legibus divinis congruentes matrimonii leges & ipse observare, & subjectis sibi in republica hominibus præscribere. Ratio est, quoniam ut omnis Princeps, ita imprimis Christianus voluntati Dei obedire tenetur. Voluntas Dei autem ipsi innotescit non modo per rationem uti Ethnico Principi sed præter hæc etiam per peculiarem revelationem supernaturalem in S. Scriptura. Itaque placitis Scripturæ S. contrariis nihil statuere, aut contra hæc dispensare potest. Verum Principis Christi-  
aniani



fiani maxime est, ut de sensu & mente legum per revelationem propositarum recte cognoscat, easque accurate cognititas habeat, ne fallatur aut ejus potestas nimium, quam par est, per explicationes textui sacro minus convenientes circumscribatur.

## §. XXI.

Univerſa itaque dispensationum difficultas circa matrimonialia, & quatenus Princeps circa hæc dispensandi facultatem habet, ad interpretationem legum divinarum earumque rectum sensum redit, vid. §. 14. In specie quod ad leges de incestu attinet, traditur de eo ex professo *Cap. XVIII. Levit.* in quod brevem hunc commentarium edimus, eademque fere de incestu leguntur *Cap. XX. v. 11. 12. 14. 17. 19. 20.* Materia vero de Polygamia deduci præcipue solet ex *Gen. I. v. 26. 27. cap. II. v. 18. 19. Matth. XIX. v. 3. 4. 5. 6. Conf. §. 8. supra.* Quanquam etiam ex *Levit. XVIII. 18.* sunt, qui prohibitionem ejus derivare velint. De qua re tamen hic non disquirimus. Uti autem de Polygamia quæri solet, an in Scriptura sit prohibita, ita de legibus incestus *Cap. XVIII. & XX. Levit.* propositis in primis disputatur: 1) An lege naturali incestus prohibeatur, an vero lege tantum positiva, tum etiam ante legem Mosaicam leges de incestu obtinuerint, an vero volente deo demum reipublicæ Judaicæ fuerint primum per Moſen latæ? Quod prius quidem *Seldenus de J. N. & Gentium juxta Disciplinam Hebræorum lib. V. & in Uxore Ebraicæ*, prolixè deducit, qui tamen *l. 5. cap. 9. J. N. & Gent.* simul probat, *Abrahamum* nuptias cum sorore uterina iniisse, & *Anramum* Jochabedam amitam suam, *Jacobum* vero duas sorores in uxores duxisse. Neque binorum fratrum cognationem obstitisse, quo minus mortuo altero, uxor ejus superstiti conjungeretur. 2) Insignis deinde dissensus in eo est, an prohibitio Mosaica tantum personas *Levit. XVIII.* expresse nominatas completatur, an vero ad gradus æque distantes extendatur? Quibus quæstionibus luculenter explicatis, nemo non videt, maximas illas difficultates, quæ Principis aut magistratus conscientiam in dispensando circa matrimonialia urgere possunt expirare.

## §. XXII.

Atque de his quidem nonnulla uberius tradi a nobis potuissent, nisi jam præfationis mensuram excessissemus, & præterea Jureconsulti pariter atque Theologi Clarissimi hanc provinciam diu ante nos occupas-



cupassent. Ut tamen in rem istam nonnulla conferremus, edere placuit in praesenti brevem commentarium celeberrimi & dum viveret iudicio est ingenii acumine clarissimi Theologi JOH. MUSAEI, Professoris quondam Jenensis, quem in *Cap. XVIII. Levitici* tanquam in propriam sedem doctrinae de incestu conscriptum reliquit. Qui cum in manus nostras incidisset, ne propter brevitatem suam forte intercidere, ab interitu hac editione vindicandus erat. Neque alio fine cum publico nunc communicatur, quam ut brevis & utilis haec *Cap. XVIII. Levitici* explicatio in materia tam frequenter obvia, neque omni ex parte expedita, lectoribus commodo sit. Uti omnia *Musaei* scripta ingenium, doctrinam & iudicium Theologicum ostendunt, ita super vacuum foret, elogio virum ornare, communi laude longe superiorem. Illud addere non abs re est, cum in coeteris scriptis suis, in primis ubi cum scholasticis argutiis ipsi negotium erat, acumen fere ad obscuritatem ostenderit terminis & loquendi modis inter Sophistas Pontificios receptis, quod in praesenti commentatione de consanguinitate & affinitate, sermone & explicatione tam plana apertaue procedat, ut ab omnibus citra difficultatem omnemque haesitantiam intelligi possit. Nullum proinde dubium est, quin ex brevi etiam hac commentatione Musæana, lectores fructum commodumque percepturi sint. Animus initio erat breviores quasdam observationes adijcere, in primis ad ea loca & Musæanas commentationes, quæ ex antiquitate hebraica, & a recentioribus aliter explicari vel solent vel possunt. In primis addi a nobis potuissent, quæ in variis Principum terris consuetudines & dispensationes circa singulares casus matrimoniales obtineant. Notum enim est, non in omnibus territoriis eandem in re matrimoniali concedi a Principibus libertatem, atque aliter in terris Brandenburgicis, aliter in Saxonis, aliter in aliis, legibus provincialibus decerni, circa secundum & tertium imo etiam quartum gradum consanguinitatis lineæ æqualis & inæqualis. Hodieque maxime in controversiam vocari matrimonium cum demortuæ uxoris sorore, aliosque casus similes, quos *Musæus* in hac sua explicatione obiter & quasi tribus quod dicitur tantum verbis attigit, de quibus plura singularia omnino adduci a nobis potuissent. Quoniam vero temporis ratio nos in praesenti a destinato consilio exclusit, fiet illud vel alio loco, aut quando commentationis hujus iterata editio forte comparebit.





AD CAP. XVIII. LEVITICI.  
DE  
CONSANGVINITATE ET AFFINITATE,  
COMMENTATIO.

---



QVAE in cap. XVIII. Levit. continentur, pertinent ad locum de Conjugio, & eo collineant, ut sua conjugio honestas & sanctimonia intemerata servetur. Prohibent enim non solum matrimonio jungi Personas, quas jungi ob intercedentem Consanguinitatem & Affinitatem turpe est, sed etiam quosvis illicitos, & honestati conjugii adversantes concubitus. Sunt proinde leges hoc capite comprehensæ duorum generum, quædam præcise occupantur circa personas, quas matrimonio jungi honestas non permittit, easque jungi prohibent, a versu 6. usque 18. Reliquæ occupantur in prohibendo quovis alio concubitu illicito a versu 19. usque 23. quibus Præceptum de liberis non offerendis Molecho inseritur. Præceptis utrisque præmittuntur proœmii loco versus quinque, adhortationem ad obedientiam complectentes. Sub finem vero adjicitur dehortatio a sceleribus prohibitis cum annexis comminationibus in transgressores severissimis, ex repetita adhortatione ad obedientiam. Recta jam ad ipsum Textum progrediemur.

A

TEXTVS.



## TEXTVS.

*Versus 1.* Et locutus est Jehova ad Mosen dicendo:

*v. 2.* Loquere ad filios Israelis, & dic ad eos: Ego Jehova DEVS vester *scilicet* sum.

## COMMENTATIO.

**H**ISCE duobus versiculis continetur mandatum DEI ad Mosen de proponendis Præceptis suis Israelitico populo, cum adjecta ratione, quia ad illorum observationem inducere eos debebat: quod est, quia illorum autor sit ipse Jehova, DEVS ipsorum, cui ad obsequium præstandum Israelitæ obligentur, non tantum jure creationis, ut alii omnes populi, & gentes, sed etiam speciali jure adoptionis. Adoptaverat enim populum Israeliticum in populum suum, sive in peculium suum, & multis insignibus beneficiis eum præ aliis omnibus populis & gentibus dignatus fuerat: inter quæ non ultimum erat, quod brachio forti eos eduxerat e servitute Ægyptiaca & jam in terram Canaan patribus ipsorum promissam introducturus erat.

## TEXTVS.

*Vers. 3.* Secundum opera terræ Ægypti, in qua habitastis, non facietis, *id est*, ne facitote, & secundum opera terræ Canaan, in quam ego duco vos, non faciatis, vel ne facitote.

*v. 4.* Et in statutis illorum non ambulabitis, vel ne ambulatote, Judicia mea facietis, *id est*, facitote.

*v. 5.* Et statuta mea custodietis, *id est*, custoditote, ad ambulandum in eis, vel ut ambule-



buletis in eis. Ego Jehova DEVS vester *scilicet* sum.

COMMENTATIO.

**I**N v. 3. & 4. continetur adhortatio ad obsequium, negative partim, partim affirmative proposita, negative quidem, quod vitare debeant Israelitæ, ostenditur in v. 3. nempe ne secundum opera, sive terræ Ægypti, sive terræ Canaan facerent. Habitaverant enim Israelitæ longo tempore in terra Ægypti, & Ægyptiorum mores, ritus, & vivendi rationem maxime cognitam & perspectam habebant. Ne ergo terram promissam ingressi, illorum mores & vivendi rationem imitarentur, hortatur Deus, ne secundum opera terræ Ægypti facerent. Ponitur autem singulare *עֲשֵׂה* opus pro plurali per enallagen numeri, & recte redduntur verba, *secundum opera terræ Ægypti*. Intelliguntur autem per opera terræ Ægypti Ægyptiorum mores, ritus & vivendi ratio, sive consuetudo, quæ prorsus impia, & ab ipsa naturali ratione ac honestate morum alienissima erat. Vulgatus interpres: *juxta consuetudinem terræ Ægypti*. Ponitur autem porro terra Ægypti per Metonymiam subjecti pro adjuncto, pro incolis terræ Ægypti, ut sensus sit: *Secundum opera sive mores, ritus & vivendi rationem incolarum terræ Ægypti, in qua habitastis, ne facitote*. Et quia Deus Israelitas jam introducturus erat in terram Canaan patribus ipsorum ante annos 400. promissam, & periculum erat, ne Israelitæ terram promissam ingressi etiam Cananæorum mores imitarentur, Deus similiter eos præmonitos voluit, & hortatus est, ne secundum opera terræ Canaan facerent, in Ebræo rursus est singulare Opus per enallagen numeri pro plurali positum, & terra Canaan ponitur similiter pro incolis terræ Canaan. Quod additur: in quam ego ducens vos, i. e. duco vos,



continet enallagen temporis præsentis pro futuro, & sensus est: *in quam ego ducturus sum vos.*

Additur interim ratio ad obsequium Israelitas inducens, superius etiã adjecta, quod est: *Ego Jehova Deus vester*: de qua, quia paulo ante diximus, nunc nihil addemus.

Affirmative proposita adhortatio continetur quarto versu, & quod agere Israelitæ debeant, ostendit: nempe Judicia Dei facere sive exercere, & statuta ejus observare debent. Verbum futuri temporis hic sæpius ponitur pro Imperativo per Enallagen.

Et custodite, id est, observate statuta mea, & judicia mea. Qui fecerit ea homo, & vivet in eis, ego Jehova.

Verba hæc continent promissionem Remunerationis, qua eos dignaturus est, qui statuta sua observaverint, & judicia sua exercuerint. Nonnulli præfixum ו *Vav* in verbo שמרתם reddunt, per particulam conditionalem, *si*, hoc sensu: Si observaveritis statuta mea, & judicia mea, homo, qui fecerit ea, tum vivet in eis, ut præfixum ו *Vav* in verbo חיה *chaja* respondeat præfixo *Vav* conditionaliter accepto, neque incommode, ut contextus ostendit.

Possunt autem verba hæc: homo, qui fecerit ea, vivet in eis, accipi (1) de conservatione & observantia legum publicarum in Politia divinitus constituta, ut eis contineatur adhortatio ad observandas leges publicas ad magistratum directa cum promissione: quæ si leges publicæ a magistratu diligenter conserventur & urgeantur, Respublica futura sit salva & incolumis, ut quisque sub vite & ficu sua tuto & tranquille vivere, & fructibus terræ vesci queat, quales promissiones sæpius Israelitis obtigerunt per Prophetas, ut 1 *Rég. IV. v. 25.* 2 *Reg. XVIII. v. 31.* *Matth. IV. v. 4.* & alibi legere est. Deinde (2) possunt hæc etiã accipi de remuneratione obedientiæ, quam Deus privato cuique statuta sua observanti promi-



promiserit, quod scilicet si statuta sua servaverit, feliciter vitam transigere in hac mortalitate debeat. Et sane negari non potest Deum remunerari etiam in hac vita renatorum obedientiam temporalibus bonis ac præmiis, si ejus legem quoad per gratiam Spiritus S. & naturæ infirmitatem possunt observent (3) Christus & Paulus explicant hæc de perfecta legis impletione & promissione vitæ æternæ. Christus item *Luc. X. v. 28.* quoniam Legis perito tentanti ipsum & dicenti: Magister quid faciendo vitam æternam possidebo, respondit in lege quid scriptum est? quomodo legis? dicenti legis perito: diliges Dominum Deum tuum &c. Respondit Christus: hoc fac & vives, digitum intendens ad hunc ipsum locum: homo qui fecerit ea, scilicet quæ in lege præscripta sunt, vivet, in eis. Significat igitur Christus, hominem, qui legem Dei facturum sit, scilicet perfecte, & sine ullo defectu vitam æternam in ea habiturum esse. Paulus vero *Gal. III. v. 11.* ubi de Justificatione hominis peccatoris coram Deo agit est ostensurus, quod in lege nemo justificetur apud Deum, hunc locum affert, quod Lex non sit ex fide, sed perfectam exigit obedientiam, cum scriptum sit, qui fecerit ea homo vivet in ipsis. Si primo & secundo sensu verba explicentur, tunc intelligenda erunt de obedientia, quanta in renatos per naturæ infirmitatem & gratiam Spiritus S. cadere potest. Si tertio sensu, tunc intelligenda sunt de obedientiæ modis & numeris omnibus perfectæ sine ullo defectu.

TEXTVS.

*Vers. 6.* Vir vir, *id est*, nemo quisquam ad carnem carnis suæ, *id est*, ad propinquum vel propinquam carnis suæ appropinquet ad retegendam nuditatem, ego Jehova scilicet sum.



## COMMENTATIO.

**V**ersus hic generalem continet legem, quæ summam perhibet omnium prohibitionum specialium, quæ in subsequentibus versiculis subjungentur, ea vero est hæc: *neminem debere appropinquare ad carnem carnis suæ, hoc est ad propinquum vel propinquam sibi consanguinitate, ut carnaliter se cum eo vel ea commisceat.* In hebræo habetur vocula **אִנְּ** bis posita, quæ alias sexus masculini nomen est, & virum significat quemlibet & bis posita notat universalitatem sine exceptione, ut reddi possit, quilibet vel quicumque vel quisquis. Deinde voculam **אִנְּ** Arias Montanus reddit reliquas, ut sensus sit: *quilibet ad quascunque reliquas carnis suæ ne appropinquet*, sed quando vox hæc significat reliquas tunc **אִנְּ** Kamez habet non **אִנְּ** Tsere, quoniam autem punctum Tsere habet sub Aleph, & legitur **אִנְּ** tunc *carnem* significat, ut **אִנְּ אִנְּ** sit caro carnis suæ. Est autem hæc quædam consanguinitatis descriptio, & dicitur caro carnis pro propinquo carni secundum generationem, ut caro carnis meæ sit idem atque propinquus vel propinqua mihi consanguinitate aut propinquus vel propinqua mihi secundum generationem sive propagationem carnis. Neque quælibet denotatur consanguinitas hac locutione, sed consanguinitas proxima, ut caro carnis meæ sit & dicatur, qui vel quæ consanguinitate me proxime attingit, sive in linea recta, quo modo caro carnis meæ est is vel ea, ex quo vel qua ego prognatus sum, vel qui vel quæ ex me natus vel nata est: sive in linea collateralis autem, qui vel quæ mecum ex eadem carne pronatus aut pronata est. Hinc lapsi sunt veteres Pontifices Romani, qui de quacunque consanguinitate legem hanc acceperunt, & conjugia in septimum usque gradum consanguinitatis prohibuerunt. Non autem quæcunque hac lege appropinquatio prohibetur ad carnem carnis suæ, sed

tantum



tantum appropinquatio seu societas conjugalis vel certa appropinquatio in carnali commixtione. Vnde additur ad retegendum nuditatem ejus. Vox עָרָו alias significat nuditatem, denudationem, revelationem, descendit a radice עָרַו nudavit, denudavit, revelavit, retexit &c. per antiphrasin autem significat verenda seu pudenda, quæ nunquam nuda sed semper tecta esse debent. Sensus igitur verborum est, neminem quenquam debere accedere ad propinquam sibi consanguinitate ad retegenda verenda ejus, h. e. ad concumbendum cum ea. Ratio prohibitionis subjungitur: quia ego sum Jehova, nempe qui legem hanc tulit, est Jehova, qui est ipsa Lex & justitia immutabilis, & ut natura turpis est carnalis commixtio inter propinquos consanguinitate, ita ipse pro sua justitia immutabili vult & præcipit, ut ab ejusmodi incestuosa commixtione omnes abstineant, quocunque etiam statu aut conditione sint, atque hoc importat vocula וְכָל בִּישׁוֹן bis posita, quæ omnimodam universalitatem importat & omnes cujuscunque status aut conditionis sint ad abstinendum a tali concubitu obligat.

TEXTVS.

*Vers. 7.* Nuditatem patris tui, & nuditatem matris tuæ non revelato, seu retegito, mater tua ipsa *scilicet* est, ne retegito nuditatem ejus.

COMMENTATIO.

**S**Equuntur nunc prohibitiones speciales, & quemadmodum in versu præcedente in genere interdictum fuerat, ne quis appropinquet ad carnem carnis suæ vel ad propinquam vel propinquum sibi consanguinitate, ita in versu præsentente prohibetur speciatim, ne quis appropinquet ad matrem suam ad retegendam nuditatem ejus, h. e. ad concumbendum



bendum cum ea, & ne quæpiam appropinquet ad patrem suum ad retegendam nuditatem ejus, vel ad concumbendum cum eo. Et quia de filia non tam facile præsumitur, quod accessura sit ad Patrem, quam de filio erga matrem, ideo postquam dixerat Deus; nuditatem Patris tui, & nuditatem matris tuæ ne retegito, de sola matre subjungit rationem prohibitionis, quæ est: mater tua ipsa est, vel, maxime tibi propinqua est consanguinitate, cum ex ea prognatus sis, atque adeo sic caro carnis tuæ. Eadem autem ratio militat etiam contra concubitum inter filiam & Patrem & tam ab eo debet abstinere filia, quia ipse sit Pater ejus, h. e. consanguinitate maxime propinquus, cum ex eo nata sit, quam filius abstinere debet a concubitu cum matre ob summam propinquitatem. Hoc igitur versu prohibetur conjugium & quilibet concubitus in primo gradu lineæ rectæ ascendentis.

Quemadmodum autem alias patris nomine veniunt & avus, proavus, atavus & sic consequenter ascendendo, & similiter matris appellatione in scripturis veniunt & avia, proavia &c. ita in præsentiarum voces patris ac matris eadem latitudine accipiendæ sunt, ut simul prohibeantur nuptiæ inter nepotem & aviam, pronepotem & abaviam & sic consequenter, ut & nuptiæ inter neptem & avum, proneptem & proavum & ita consequenter. In linea recta enim prohibentur nuptiæ in infinitum.

#### TEXTVS.

*Vers. 8.* Nuditatem uxoris patris tui, ne retegito, nuditas patris tui ipsa, *scilicet* est.

#### COMMENTATIO.

**H**Oc versu prohibetur primus affinitatis gradus in linea recta, nempe ne quis cum noverca sua concumbat. In Ebræo est nuditatem uxoris patris tui ne retegito. Vbi per



per uxorem patris si verba in se spectes generaliter quidem intelligi potest, quælibet uxor patris, & quæ mater tua est, sed in præsentiarum verba hæc continent descriptionem novercæ, & denotant uxorem patris tui matri tuæ contra distinctam, sive uxorem patris tui, quæ non simul mater tua est, sive quæ tua noverca est, nam de uxore patris tui, quæ tua etiam mater est in versu præcedente actum, & ne nuditatem matris tuæ retegas interdictum est.

Et de hoc convenit inter interpretes, quod per uxorem patris tui hic loci intelligatur noverca tua, sunt tamen, qui hunc gradum ad consanguinitatem referunt, ea forsan ducti ratione, quod noverca per patris nuptias assumpta in lineam rectam, transeat cum patre in unam carnem, & liberi ex ea suscepti, tui, sint consanguinei, fratres scilicet & sorores tuæ, & quod eidem filialis reverentia a te debeatur, sed quia proprie loquendo consanguinitas est carnis propinquitas, ex generatione orta inter novercam autem & privignum talis propinquitas non intercedit, sed interventu nuptiarum, quæ inter novercam & patrem tuum intercesserunt noverca tibi propinqua facta est: accurate loquendo propinquitas hæc affinitatis potius quam consanguinitatis rationem habet, quicquid tandem sit de vocibus: rem ipsam quod attinet, convenit inter omnes, versu hoc prohiberi appropinquationem sive conjugium inter filium patris & ejus uxorem, quæ est noverca filii. Ratio prohibitionis redditur hæc: quia nuditas patris tui est; id nonnulli reddunt, quia nuditas novercæ tuæ ad patrem tuum spectat, id est patri licet eam retegere non tibi, qui es patri tuo maxime propinquus, sive qui es caro patris tui, & propterea eandem debes reverentiam novercæ tuæ quam patri tuo debes. Alii passive hæc reddunt, hoc sensu, quia nuditas patris tui est, id est quia nudata est a patre tuo, & ob reverentiam quam patri tuo & conse-



quenter ipsi etiam debes, eandem nudare sive retegere tibi non licet. Res videtur eodem redire.

TEXTVS.

*Vers. 9.* Nuditatem sororis tuæ, filiæ patris tui, aut filiæ matris tuæ natæ domi, (velut alii reddunt cognationis domesticæ,) aut natæ foris, sive cognationis exteræ, ne retegito nuditatem illarum.

COMMENTATIO.

**V**ersu hoc prohibentur nuptiæ in primo consanguinitatis gradu lineæ collateralis, sive transversæ, quæ est (1) inter fratrem & sororem germanam, hoc est inter fratrem & sororem ex eodem patre & matre eadem natam (2) inter fratrem & sororem agnatam, id est inter fratrem & sororem ex eodem quidem patre sed non ex matre eadem natam (3) inter fratrem & sororem uterinam hoc est ex eadem matre quidem, sed non patre eodem natam. Et quidem per filiam patris natam domi significatur soror agnata, hoc est quæ nata est ex patre meo, sed ex alia uxore, quam matre mea. Per filiam vero matris intelligitur soror uterina, quæ natu est matri meæ, sed ex alio marito, quam patre meo, & hæc dicitur Soror nata foris, sive cognationis exteræ. Quod si per verba initialia nuditatem sororis tuæ intelligatur soror germana, cum omnia tria Consanguinitatis genera, sive Conjugium cum triplici sororis ordine aut genere expresse versu hoc interdicitur.

Si vero verba initialia nuditatem sororis tuæ intelligantur generaliter de sorore, quæ postea restringitur, ad filiam patris & ad filiam matris, domi aut foris natam, tum expresse hic prohibebitur, tantum conjugium inter fratrem & sororem



rem agnatam ac uterinam, implicite autem & per consequentiam prohibentur & nuptiæ inter fratrem & sororem germanam. Inter hos enim Consanguinitatis vinculum arctius est, quippe qua ratione utriusque Parentis conjunguntur, & si non licitum matrimonium inter fratrem & sororem agnatam aut uterinam, multo minus licitum erit inter fratrem & sororem Germanam.

Sunt tamen qui existimant vi subsequentiæ natæ domi aut natæ foris prohiberi non tantum matrimonium inter fratrem & sororem agnatam aut uterinam legitimam, sed & inter fratrem & sororem agnatam aut uterinam spuriam. Sciendum ergo, quod additamentum illud natæ domi aut natæ foris duplici sensu soleat explicari, uno, ut natu domi sic explicetur, quæ est cognationis paternæ, sive quæ ex patre meo nata est, nata autem foris dicatur, quæ est cognationis exteræ, id est, quæ, quamvis ex matre mea in legitimo conjugio nata sit non tamen in domo patris mei, sed extra eam priusquam patri meo nupserit, quæ enim non est paternæ cognationis, soror foris genita sive cognationis exteræ dicitur esse. Et hoc sensu hactenus verba hæc interpretati sumus communem interpretum sententiam secuti, quidam vero domi natam dicunt esse natam in legitimo conjugio, sed foris natam dici, quæ extra conjugium nata est, sive quæ soror spuria est ut sensus hic sit: *nuditatem sororis tuæ filie patris tui aut filie matris tuæ, nata domi hoc est legitimo conjugio genita, aut nata foris, id est extra conjugium ex fornicatione genita,* ita Lyra in hunc locum interpretati sunt, & nonnulli alii & sane, par prohibitionis ratio est, qua prohibetur ne quis sororem agnatam aut uterinam legitimam & ne eandem spuriam ducat in matrimonium. Carnis propinquitas etiam utrobique eadem est.



## TEXTVS.

*Vers. 10.* Nuditatem filiae filii tui, aut filiae filiae tuae ne retegito, nuditatem illarum, quia nuditas tua ipsa.

## COMMENTATIO.

**H**Oc versu prohibetur matrimonium inter avum & neptem ex filio aut filia susceptam sive natam, qui est secundus Consanguinitatis gradus in linea recta descendente. Quemadmodum autem in gradu secundo non licet ducere neptem ex filio aut filia natam, multo minus filiam ducere licet, quippe quae patri propinquitate carnis arctior devincta est, & in primo consanguinitatis gradu ab eo distat. Ratio prohibitionis & subjecta aequae militant contra conjugium inter patrem & filiam ac inter avum & neptem. Si enim neptis ita propinque attingit avum, ut ejus nuditas moraliter reputetur ipsius avi nuditas, & qui retegendo nuditatem neptis, ita potentem rem agit, ac si in se ipsum aliquid pudendum perpetret: multo magis filiae nuditas erit nuditas ipsius patris obstabitque quo minus filiam ducere patri liceat, neque tantum inter avum & neptem patrem & filiam prohibetur carnalis conjunctio, sed sub appellatione neptis implicite continentur omnes in linea recta descendentes proneptis, abneptis & consequenter, hinc regula est receptissima, *quod in linea recta cum ascendente tum descendente, nuptiae prohibeantur in infinitum*, ut si Adam adhuc superesset in vivis & uxorem ducturus esset in universo humano genere non inventurus sit quam ducere ipsi liceret.

## TEXTVS.

*Vers. 11.* Nuditatem filiae uxoris patris tui natae patri tuo, vel natae patris tui *scilicet ne retegi-*



*retegito, soror tua est, ne retegito nuditatem ejus.*

COMMENTATIO.

**V**ersus hic insignem continet difficultatem & provenit difficultas ex ejus collatione cum præcedente versu 9. nam si per filiam uxoris patris intelligatur filia novercæ nata patri ex noverca sive altera ejus uxore, tum matrimonium hoc jam in præcedente versu 9. expresse prohibitum est, quoniam prohibitum est ne quis retegat nuditatem sororis suæ natæ patris sui scilicet ex alia uxore, quæ est ipsa filia uxoris patris, sive filia novercæ tuæ quam versu 11. jam ducere prohiberis. Vero autem consentaneum minime videtur unum eundemque gradum consanguinitatis in tam succincta & concisa legum comprehensione bis expresse prohiberi & quidem unico tantum versu interposito: hinc diversæ ortæ sunt Interpretum sententiæ, & *primum* quidem per uxorem patris intelligendum nonnulli existimant matrem germanam, ut sensus hic sit: *nuditatem filia uxoris patris tui natæ patris tui, id est nuditatem sororis tuæ Germanæ natæ patri tuo ex matre tua nuditatem ne retegas*, ut ita versu hoc prohibeatur conjugium inter fratrem & sororem germanam. Verum hæc interpretatio inde habet difficultatem, quod uxor patris in Scriptoribus non soleat accipi pro matre germana, sed accipiatur pro noverca, id quod ex præcedentibus versiculis 7. & 8. inter se collatis liquido patet, nam versu 7. uxor patris quæ est Mater germana tua, simpliciter vocatur mater tua, cum dicitur: *nuditatem matris tuæ ne retegito*, sed versu 8. cum prohiberi debet concubitus privigni cum noverca, dicitur demum differentia causa: *nuditatem uxoris patris tui ne retegito*, ut distinguatur noverca a matre germana; quamvis enim utraque sit uxor patris ge-



neraliter loquendo, quæ tamen est tua mater germana, simpliciter mater tua dicitur, quæ autem est noverca tua, non mater tua sed specialiter uxor patris tui dicitur, & quia versu 11. eadem repetitur locutio & dicitur: *nuditatem filie uxoris patris tui ne retegito* &c. rectius statuitur, quod per uxorem patris tui intelligatur uxor ejus, quæ non est mater tua germana sed noverca tua, ut sensus sit: *nuditatem filie novercæ tuæ nata patris tui ne retegito* &c. quia autem hoc, uti dictum, jam ante versu 9. est prohibitum, ideo alii secundo per filiam novercæ tuæ intelligendam esse dicunt neptem novercæ tuæ, ut sensus sit: *neptem uxoris patris tui, sive novercæ tuæ ne retegito* &c. Verum hæc interpretatio suas habet difficultates, quamvis enim per filiam quandoque apud Hebræos neptis intelligatur, hic tamen in tam concisa legum recensione improprietas hæc vix admitti potest, præsertim cum in versu præcedente 10. expresse actum sit de nepte patris, eaque dicta sit filia filiæ, aut filia filii, minime autem filia uxoris patris, neque facile locus in scripturis occurrit, ubi per filiam novercæ intelligatur neptis, ita ut ipsa dicatur filia patris, si vero occurrit locus, ubi neptis ex privigna patris dicatur filia uxoris patris nata patris, hoc ipso enim, quod additur nata patris, significatur, quod non sit neptis ex privigna patris, sicut enim privigna non est nata patris, ita nec neptis ex privigna dici posse videtur nata patris, unde tertio alii de prohibitione comprivignorum hæc accipiunt hoc sensu: *nuditatem filie uxoris patris tui nata patris tui h. e. assumptæ cum matre in domum patris, & quæ habetur eodem loco, ac si esset nata patris, ne retegito.* Verum hæc interpretatio eandem patitur difficultatem quam prior patitur. Nam additamentum illud natæ patris tui non frustra adjectum est, sed est determinatio quædam filiæ novercæ ad filiam non ex alio marito, sed ex ipso patre suo natam,



tam, præterea repugnat huic interpretationi praxis Ecclesiarum, nam matrimonium inter comprivignos in Ecclesiis ubique locorum permittitur. Hinc *quarto* quidam locum interpretatus est de comprivignis quidem non quibusvis, sed quibus adnatus est novus frater, aut nova soror adnata est, ut & vocem מולדת *natum* quam vulgo omnes passive reddunt per *natum* patris active is interpretatur, ut sit participium Hiphil hoc sensu: *Nuditatem filia uxoris patris tui i. e. noverca tua parientis patri tuo, ne retegito &c.* Atque hæc interpretatio fuit Samuelis Golii ante annos paucos in Academia Rostochiensis Prof. Publ. qui mordicus eam defendit contra Theologos, præsertim Gutmannum Theologia in Academ. ead. Profess. Concedebat Golius inter comprivignos, quibus non supervenit novus frater aut nova soror, locum habere matrimonium, sed eo casu, si pater ex noverca suscepit prolem, non licere tunc comprivignos matrimonium inire, rationem positam habebat in una voce מולדת quæ sit participium Hiphil & active reddi debeat hoc sensu: *nuditatem filia uxoris patris tui, parientis patri tuo ne retegito &c.* Verum huic opinioni obstat primum quod verbum ילד quod in Conjugatione Kal de masculis & foeminis promiscue usurpatur, & gignere ac parere significat, in Conjugatione Hiphil nunquam usurpatur de foemina, ut parere significet, sed semper gignere significat, unde quia uxori patris non convenit gignere cum hoc patris sit, res ipsa exigit, quod vox מולדת non debeat referri ad uxorem patris, & explicari de uxore patris pariente. Vnde alii existimant מולדת esse participium passivum Hophal, & ו Cholem esse positum pro ו Vau schurec ut מולדת dicatur pro מולדת & referri debeat ad voculam בת filiam hoc sensu: *nuditatem filia noverca tua nata patris tui, scilicet ex noverca, & sane hujus formæ participia Hophal plura*

occur-



occurrunt, ut videre est apud Buxtorff. in Thes. Gramm. Quidam vocem מולד nomen participiale esse volunt, & reddunt per cognationem, hoc sensu: *nuditatem filia uxoris patris tui cognationis patris tui*, sed filiam cognationis patris sive cognationis paternæ intelligunt similiter de filia quæ est nata patris, ut distinguatur a filia cum matre quidem assumpta in domum patris, sed non cognationis paternæ, sive non nata ex patre. Videtur ergo simplicissimam esse sententiam, *quod hic prohibeatur matrimonium inter fratrem atque sororem uterinam, h. e. vel inter fratrem & sororem agnatam, h. e. inter fratrem & sororem natam patri ex alia uxore, sive ex noverca, neque obstat, quod conjugium hoc etiam in præcedente versu 9. implicite fuerit prohibitum, videtur enim majoris Emphaseos causa prohibitionem eandem hic repeti & expresse poni, cum periculum esset, ne talia matrimonia in consuetudinem venirent, vel etiam, quod jam ante fuerint usu recepta, & propterea expressius prohibenda.*

#### TEXTVS.

*Vers. 12.* Nuditatem sororis patris tui, sive amitæ tuæ ne revelato, caro, sive propinqua consanguinitate patris tui est.

#### COMMENTATIO.

**H**Oc versu prohibetur secundus consanguinitatis gradus lineæ collateralis inæqualis, nempe qui est inter filium patris & sororem patris, Pater & Soror in primo distant gradu lineæ æqualis. Ratio prohibitionis additur, quod soror patris sit שׂאֵר אִבִּיךָ *caro patris tui*, h. e. pro generatione carnis propinqua patris tui, est enim eodem patre tuo orta, propinquitas autem, quæ est inter sororem patris & patrem tuum, impedit, quo minus tibi matrimonium cum ipsa inire liceat.



liceat. Obstat enim pudor & reverentia, quam ipsa ratione naturali dictitante debes sorori patris tui, hac ipsa de causa, quod sit caro patris tui, h. e. consanguinitate propinqua patri tuo.

TEXTVS.

*Vers. 13.* Nuditatem Sororis matris tuæ sive materteræ tuæ ne retegito, quia caro matris tuæ est, h. e. consanguinitate propinqua est matris tuæ.

COMMENTATIO.

**H**Oc versu idem consanguinitatis gradus prohibetur, qui præcedente versu 12. prohibitus est, nempe gradus secundus lineæ collateralis inæqualis, tantum differunt, quod in versu 12. prohibetur gradus secundus lineæ paternæ, ne scilicet filius patris cum sorore patris concumbat, in versu 13. autem prohibetur idem gradus, sed in linea materna, ne scilicet filius matris in uxorem ducat sororem matris, unde ratio prohibitionis etiam utrobique eadem est. Quemadmodum enim filius patris prohibetur sororem patris in uxorem ducere propterea quod ipsa patri ejus sit consanguinitate propinqua, ita & filius matris prohibetur in uxorem ducere sororem matris itidem, quod soror matris sit matri consanguinitate propinqua.










TEXTVS.

*Vers. 14.* Nuditatem fratris patris tui h. e. patruus tui ne retegito, ad uxorem ejus ne appropinquato, amita tua est.

COMMENTATIO.

**V**ersu hoc duplex continetur prohibitio, una prohibetur secundus gradus consanguinitatis lineæ collateralis inæqualis,



æqualis, qui est inter filiam patris & fratrem patris, cujus prohibitionis eadem est ratio, quæ in duobus versibus præcedentibus 12. ac 13. fuit, nempe sicut filio patris vel matris non licet conjugium inire cum sorore patris aut matris, ita nec filia patris conjugium inire licet cum fratre patris, sive patruo, est enim eadem consanguinitatis propinquitas, & quam reverentiam debet filius patris vel matris amitæ aut materteræ suæ, eam debet etiam filia patris patruo suo, sive fratri patris sui. Altera prohibitio est in affinitate, & prohibetur ne filius patris cum uxore patruï sive viduæ patruï derelictæ conjugium ineat. Est autem eadem distantia inter filium patris & viduam derelictam patruï, quæ est inter filiam patris & patruum. Solum differentia est, quod prior propinquitas affinitatis est, posterior consanguinitatis. Ratio prohibitionis adjecta pertinet ad posteriorem tantum prohibitionem, quæ est: *Amita tua est*, h. e. uxor patruï tui est. Quam reverentiam enim debet filius patris patruo suo, eam debet & uxori ejus, quæ est una cum ipso caro, & ob hanc affinitatis propinquitatem non potest eam in uxorem ducere; quod prohibitio hæc sit intelligenda de vidua patruï, inde patet, quod uxorem patruï non tantum filio ex fratre, sed nemini ducere liceat, esset enim adulterium & raptus, alterius uxorem marito vivo ducere. Vocula    descendit a nomine   , quod significat alias amores; deinde transfertur ad significandum patruum sive patris fratrem ob affectum amoris, quo erga filium ex fratre affici patruus solet & foemininum    significat uxorem patruï, quo significata hic etiam accipitur.

TEXTVS.

*Vers. 15.* Nuditatem nurus Tuæ ne detegito,  
uxor filii tui est, ne retegito nuditatẽ ejus.

COM.



COMMENTATIO.

**H**Oc versu prohibetur affinitatis gradus primus lineæ directæ descendenti, qui est inter patrem & nurum, sive uxorem filii. Quo gradu enim filius distat a patre in linea recta descendente, eo gradu distat etiam uxor filii a patre, quod filius patri consanguinitate, uxor ejus autem affinitate propinqua est. Distat autem filius a patre in primo consanguinitatis gradu lineæ rectæ descendenti, ergo & uxor filii hoc affinitatis gradu distat a socero suo, sive patri mariti sui vox כלה alias significat sponsam & denominatio fit a perfectione sive consummatione, quod sponsa soleat perfecte esse ornata, sive soleat esse ornatus consummati, quia autem sponsa filii per matrimonium fit nurus patris ejus, transfertur hinc nomen hoc ad significandam nurum, quod autem nurum hic significet, non sponsam, inde patet, quod statim subjicitur: uxor filii tui est. Significat ergo כלה h. l. non sponsam sed uxorem filii, sive nurum. Ratio prohibitionis rursum petitur ex propinquitate. Cum enim filius sit caro patris sui, h. e. propinquitate carnis maxime vicinus, & uno tantum gradu ab ipso distans, ob hanc ipsam consanguinitatis propinquitatem prohibetur pater ducere nurum, sive uxorem filii. Est autem hoc ipsum etiam intelligendum de uxore filii filio emortuo relicta sive vidua, nam cum filii adhuc vivi uxore nec patri, nec cuiquam alii rem habere licet per legem generalem de non adulterando.

TEXTVS.

*Vers. 16.* Nuditatem uxoris fratris tui ne retegito, nuditas fratris tui est.

COMMENTATIO.

**H**Oc versu prohibetur affinitas in primo gradu; sicut enim frater in primo consanguinitatis gradu sibi invi-



cem conjuncti sunt, ita & frater & uxor fratris in primo affinitatis gradu sibi invicem conjuncti sunt. Ratio prohibitionis redditur, quia nuditas uxoris fratris tui est nuditas fratris tui, utpote cum quo in unam carnem per matrimonium transiit, frater tuus autem est caro tua h. e. consanguinitate tibi proxime conjunctus, ob quam sanguinis propinquitatem tibi non licet retegere nuditatem uxoris ejus.

#### TEXTVS.

*Vers. 17.* Nuditatem uxoris & filia ejus ne retegito, filiam filia ejus & filiam filii ejus non accipies h. e. accipito, ad retegendum ejus nuditatem. Caro ipsa, h. e. caro tua est, scelus est.

#### COMMENTATIO.

**H**Oc versu prohibetur primus & secundus affinitatis gradus lineae rectae descendentes, ne scilicet quisquam ducat in uxorem suam privignam aut neptem ex privigna aut privigno, quando enim dicitur nuditatem uxoris & filia ejus ne retegito, per filiam uxoris intelligitur filia, quam uxor peperit ex alio marito, quae est privigna mariti praesentis, neque prohibetur in *sensu copulativo*, ne ipsius uxoris etiam nuditatem retegat, hujus nuditatem enim retegere licet marito hoc ipso, quod uxor ejus est, vi primae institutionis, sed prohibetur tantum, ne retegat nuditatem filiae matris quae uxor ipsius est, & praeterea prohibetur, ne etiam nuditatem retegat neptis sive filii, sive filiae uxoris, qui est secundus gradus affinitatis in linea recta descendente, quemadmodum autem supra diximus de consanguinitate in linea recta cum ascendente, tum descendente prohiberi nuptias in infinitum, id ipsum etiam intelligendum est de affinitate in linea recta cum



cum ascendente tum descendente, unde licet secundus tantum gradus hic exprimatur, implicite tamen simul prohibiti censentur alii omnes gradus linea descendents, quamvis expresse hic non habeantur.

Ratio prohibitionis redditur hæc, *quia sunt propinquitates ipse* h. e. uxori tuæ propinqua est filia & neptis ejus, & cum uxor tecum sit una caro, ideo tibi etiam propinquæ sunt, unde concubitus cum illis **למה** *scelus est* h. e. res scelerosata est, abominanda. Vox **למה** descendit a radice **למ** cogitavit & excogitavit, quæ tamen plerumque accipitur in malam partem pro cogitavit malum, & per Metonymiam efficientis pro effectu significat etiam machinatus est, patravit scelus vel malum & similiter vox **למה** significat cogitationem malam, per Metonymiam efficientis &c. significat rem patratam malam, scelus patratum; quo sensu hic accipitur.

TEXTVS.

*Vers. 18.* Ad uxorem & sororem ejus, ne accipito ad angustandum (ad affligendum) ad retegendum nuditatem ejus, super eam invitis ejus h. e. dum vivit.

COMMENTATIO.

**H**ic versus ab interpretibus modo non uno explicatur. (1.) Enim quidam verba (ut sonant) accipiunt & volunt prohiberi iis, ne quis simul duas ducat sorores, nam verba *ad uxorem sororem ejus ne accipito* proprie accepta hoc important, *ne quis duas accipiat sorores, sive ducat sorores*; deinde quod additur: *ad affligendum*, continet rationem prohibitionis, quia soror sorori superinducta affligit eam, est enim perpetua inter sorores rixa, quarum unus est maritus, ut patet exemplo conjugii Jacobi cum Rahele & Lea duabus



sororibus. (2.) Simultaneum conjugium cum duabus sororibus prohiberi evincit insuper additamentum *super eam in vitis ejus* h. e. dum vivit prior uxor, quæ soror est, quod non videtur temere vel otiose additum esse, qua interpretatione stante sequetur primo *πολυγαμίαν* esse permissam, & prohiberi tantum *πολυγαμίαν* cum duabus vel pluribus sororibus, secundo uxore demortua licere ejus sororem ducere in uxorem. (3.) Id etiam inde evinceretur, quod duas simul ducere uxores non sit contra *Jus Naturæ*, sed tantum prohibeatur ob incommoda, quæ tale conjugium comitari solent, nempe ob rixas, & mutuas afflictiones, quibus sorores uni & eidem marito matrimonio junctæ se invicem angere solent, si autem contra *Jus Naturæ* esset Conjugium cum duabus sororibus, & concubitus cum illis incestuosus, tunc non magis liceret uxori superinducere sororem dum vivit, quam eadem demortua sororem ejus in uxorem ducere. Alii vero & cum primis *Johannes Tarnovius* in Exercit. Biblicis verba hæc aliter explicant, & per sororem non intelligunt proprie dictam, & sanguinis propinquitate conjunctam uxoris sororem, sed quamlibet mulierem, ut sensus hic sit: *Et mulierem ad uxorem sive mulierem ad mulierem ne accipito*, ut ita simpliciter prohibeatur simultanea *πολυγαμία*. Quemadmodum enim sororis voce alias in sacris quælibet res ad alteram collata significetur v. g. *Exod. XXVI. v. 3.* quinque cortinæ conjunctæ dicuntur quælibet ad sororem suam, una ad alteram, ita impræsentiarum existimant *וְאִתָּהּ אִשָּׁתָּהּ* mulierem ad sororem suam denotare hoc, ne alteram mulierem ad alteram & sic duas simul quis in uxores ducat, cum inter plures uxores soleat esse mutua angustia, rixæ & contentiones; hujus interpretationis Tarnovius dicto loco rationes affert sequentes: (1) quia jam ante per analogiam prohibitum est, ne quis suæ uxoris sororem



rem consanguineam ducat, nam vers. 16. prohibetur, ne quis in uxorem ducat fratris uxorem, scilicet demortui filiam relictam, hoc ipso autem per analogiam etiam prohibitum est, ne quis uxoris suæ sororem ducat, cum utrobique sit par affinitatis ratio, ergo quod jam ante per Analogiam prohibitum fuit, id hoc 18. versu non denuo prohibetur. Hæc prima Tarnovii ratio est, sed ea videtur parum habere roboris, non enim sequitur, quod alibi per analogiam prohibitum est, id non denuo lege alia prohibetur expresse, nam v. g. versu 9. v. 7. prohibitum fuit conjugium inter filium & matrem, & per analogiam etiam prohibitum fuit conjugium inter patrem & filiam, cum utrobique par consanguinitatis ratio, eademque personarum distantia sit, & tamen vers. 10. prohibetur etiam expresse, ne pater in uxorem ducat filiam. II. urget Tarnovius, quod hic prohibeantur mulieres se invicem angentes simul matrimonio jungi, tales mulieres autem non tantum sunt sorores, sed etiam aliæ quævis, inter quasvis enim mulieres, quarum unus est maritus, dantur æmulationes, rixæ & contentiones, ergo non tantum sorores, sed & quævis mulieres prohibentur simul uni jungi marito, verum hæc etiam ratio tantum in recessu non habet, quantum videri poterat habere, quamvis enim inter quasvis mulieres, quæ uni marito matrimonio junguntur, rixæ & contentiones esse soleant, majores tamen sunt inter sorores, quæ videri poterat causa esse, cur Deus prohiberet ne duas sorores quis matrimonio sibi simul jungat, utut duas alias consanguinitate sibi non conjunctas ducere permiserit. III. Ratio est, quod in primæva conjugii institutione implicite prohibita sit *πολυγαμία* simultanea. Necesse igitur est ut alicubi etiam expresse prohibeatur, nuspiam autem quam in hoc loco prohibetur. Recte ergo hic loci ea prohibita censetur. Verum hæc etiam non satis solida esse videtur ratio,



ratio, si enim vel maxime in primæva conjugii institutione *πολυγαμία* simultanea implicite prohibeatur, quia tamen Deus jam ante Moſen eam permiserat S. Patriarchis, & ſuis de cauſis etiam poſt legem ſolemniter promulgatam permiſſurus Judæis, nulla ſane cauſa erat cur in lege vel alibi expreſſe prohiberetur, imo ſi eam expreſſe Deus prohibuiſſet, permiſſionem ejus jam ante patribus indultam e medio ſuſtulſſet, quia ergo Deus diutius eam permittere certis de cauſis voluit, nihil ſane opus erat, ut lege expreſſa eam prohiberet. IV. Urget Tarnovius, quod h. l. illa intelligatur ſoror quam altera demortua in uxorem ducere licet, ſed ſororem conſanguineam ſive proprie dictam altera demortua in uxorem ducere non licet, ergo ſoror proprie dicta ſive conſanguinea hic non intelligitur, ſed quævis mulier. Hæc quarta Tarnovii ratio eſt, ſed hæc ratio non eſt extra controverſiam poſita, ut poſtea dicturi ſumus. Prior igitur interpretatio de ſorore proprie dicta Theologiſ eſt receptior, eique favet *primo*, quod phraſis hæc *וְהָיָה אִשָּׁתְּךָ אֶל הָאִשָּׁה הַמֵּתָה* mulierem & ſororem ejus de ſexu ſœmineo uſurpata nuſpiam in ſacris literis adhibeatur de quibusvis ſœminis, ut ſenſus eſſe poſſit: & mulierem unam ad alteram ne accipito, legitur quidem aliquando phraſis hæc uſurpata pro eo, quod eſt unam ad alteram, ſed non de ſexu ſœmineo, ſed de rebus inanimatis tantum vel certe de rebus ratione carentibus, de hominibus autem & ſexu hominis ſœmineo nuſpiam ita generaliter accepta invenitur, nec vero conſentaneum eſt Moſen h. l. legiſlatoris officio fungentem, ubi cum primis proprie loqui debebat, ea improprietate phraſin hanc adhibuiſſe, qua aliter nuſpiam in ſacris adhibita invenitur. (2) *πολυγαμία* non tantum permiſſa erat tempore promulgatæ legis, ſed poſtea etiam in populo Iſraelitico conceſſa fuit, quin imo certo caſu etiam præcepta fuit, nempe eo caſu, quo frater mortu-



mortuus fuerit sine prole, receptum fuit lege ut frater demortui fratriam fratris demortui viduam in uxorem duceret, si frater residuus jam habuit uxorem ducta fratria derelicta duas certe uxores vi legis divinæ habere debuit; Extat autem lex hæc de ducenda fratria *Deut. XXV. v. 5.* Excipit quidem *Tarnovius* casum hunc, vel legem hanc spectasse tantum ad fratrem residuum cœlibem, non autem obligasse fratrem jam uxoratum, at vero hæc restrictio ad fratrem cœlibem in textu non habetur, sed contra potius exemplo Boæ, qui uxoratus erat, & tamen vi legis allegatæ Rutham viduam Elimelech ducere obligabatur, ut *cap. IV. libelli Ruth* legere est. Tertio referri huc potest, quod *Deuter. XVII. v. 16.* Deus specialiter prohibet, ne Rex Israelitarum nimium multiplicet uxores, sed si *πολυγαμία* verbis versiculi 18. simpliciter esset prohibita, nihil opus fuisset hac speciali prohibitione, legibus enim *Levit. XVIII.* comprehensis Rex Israelitarum æque tenebatur & obligabatur atque subditi. (4) Deus tradidit Davidi plures uxores, nempe uxores Domini sui Regis Saul, ut ex posteriori *Samuel. XII. v. 8.* legimus. Si vero *πολυγαμία* lege hac esset prohibita, sane Deus non tradidisset Davidi uxores plures contra legem a se latam; neque est quod dicatur, locum illum intelligendum esse permissive, nam textus videtur arguere, quod non nuda permissio, qualis fuit v. g. quando permisit, ut Salomon plures amaret uxores, & quidem alienigenas. (5) Gentes dicuntur expulsæ, quod contra has leges egerint, non tamen Israelitæ expulsi dicuntur terra sua ullibi ob *πολυγαμίαν*, quin Jacob, cui terra Canaan promittebatur, plures habebat uxores. Hæ rationes adduci solent, & videntur utcunque favere interpretationi illi, quæ verba ut sonant de duabus sororibus accipiunt, potissimum tamen fundamentum præbet vocum



proprietas, quæ in legibus hisce ubique stricte observatur,  
 unica tamen difficultas, qua præmitur hæc interpretatio, vi-  
 detur in eo consistere, quod additur: in vitis ejus, sive dum  
 vivit, qui *πρὸς τοιοῦτος* videtur hoc importare, *quod uxore  
 demortua liceat ducere sororem ejus*, si enim tantum id pro-  
 hibetur, ne quis ducat uxoris suæ sororem, ad angustandum  
 eam, dum vivit, sequi videtur, quod uxore demortua foro-  
 rem ejus ducere liceat. Hic enim *πρὸς τοιοῦτος*, dum vivit,  
 videtur continere rationem prohibitionis, ne scilicet uxor  
 per superinductam sororem ejus affligatur & angustetur, quæ  
 ratio uxore demortua cessat. Verum responderi potest,  
*πρὸς τοιοῦτος* hunc negare tantum tempus antecedens, non  
 consequens ponere. Constat enim quod particula *donec*,  
*usque*, quibus respondet hic *πρὸς τοιοῦτος* in vita ejus, non  
 semper ponant tempus consequens, sed negent tantum ante-  
 cedens, sicut v. g. cum de Josepho dicitur, quod non cogno-  
 verit Mariam, donec pepererit filium suum primogenitum,  
 particula donec negat tantum tempus antecedens, h. e. ne-  
 gat Mariam esse a Josepho cognitam ante natum Christum,  
 non autem ponit tempus consequens, h. e. non infert quod  
 post natum Christum Maria a Josepho cognita fuerit. Impræ-  
 sentiarum idem dici potest, nempe, verba legis: ad uxorem  
 sororem ejus ne accipito ad angustandum eam in vita ejus,  
 h. e. donec, vel dum vivit, sensus bene potest hic esse: *neminem  
 debere uxore vivente sororem ejus superinducere*, non quod  
 uxore demortua sororem ejus ducere liceat, sed tantum ne-  
 gatur illud antecedens, nempe uxori non superinducendam  
 esse sororem ad angustandum eam in vita ejus, ut tamen con-  
 sequens, nempe uxore demortua sororem ejus ducere licere,  
 minime ponat. Deinde *πρὸς τοιοῦτος* ille, in vita ejus, non  
 pertinere videtur ad verbum accipito, sed ad Gerundium ad  
 angustandum eam, hoc sensu: *uxorem ad sororem ejus ne  
 accipi-*



*accipito ut eam in vita ejus angustes, affligas &c.* Et sane uxoris sororem etiam uxore demortua non licere ducere in uxorem, patet ex præcedente versu 16. ubi prohibitam est ne quis nuditatem uxoris fratris sui retegat, eo quod sit nuditas fratris sui. Quæ Lex implicite & per analogiam prohibet, ne quis uxoris suæ sororem ducat, eo quod nuditas ejus sit nuditas uxoris ejus, est enim utrobique eadem graduum distantia in eodem affinitatis genere. Hunc in modum solet difficultas hæc communiter expediri, videtur tamen hic quandam subesse rationem dubitandi, de qua postea sumus dicturi, quoniam scilicet de quæstione, an personæ tantum, an vero gradus & graduum distantia præcise legibus hisce prohibeatur, atque hæc enumeratæ & explicatæ sunt, quæ concernunt consanguinitatis & affinitatis prohibitos gradus, reliquæ autem leges in eodem capite subjectæ non spectant ad materiam præsentem, de gradibus affinitatis & consanguinitatis prohibitis, quas proinde impræsentiarum non attingemus. Duo autem huc spectantia supersunt explicanda, VNVM concernit rationem supputandi consanguinitatis & affinitatis gradus, ut, quinam permixti, qui prohibiti sint, rectius cognosci possit; ALTERVM concernit quæstionem controversam, utrum personæ saltem expresse nominatæ matrimonio jungi prohibeantur, an vero gradus æque distantes cum in Consanguinitate, tum in Affinitate omnes prohibeantur.

*Consanguinitas dicitur personarum attinentia, sive propinquitas ex generatione proveniens, sive ex eo proveniens, quod una persona ab altera vel ambæ ab eadem per generationem descendunt, sic v. g. filius est consanguinitate conjunctus patri, sive pater & filius sunt consanguinei, quia filius descendit a patre per generationem; rursus duo fratres vel duæ sorores, vel frater & soror sunt consanguinei,*



quia ab eadem persona, patre scilicet, vel matre, vel utroque per generationem descendunt. Fundamentum ergo consanguinitatis est generatio, sive carnalis propagatio per generationem, & quidem consanguinitas distinguitur in agnationem & cognationem. Cum enim consanguinei descendant unus ab altero, vel ambo ab aliquo tertio per generationem, vel ratione utriusque parentis, vel ratione alterutrius parentis tantum, patris scilicet vel matris, vel potius consanguinei sunt sanguinis propinquitate sibi invicem conjuncti, vel ratione lineæ paternæ, vel ratione lineæ maternæ; qui ratione lineæ paternæ, vel qui in linea paterna sibi invicem sanguinis propinquitate conjuncti sunt, dicuntur agnati, v. g. fratris mei filius est mihi agnatus, propterea quod in linea paterna ab eadem persona, sive ab eodem communi stipite mecum descendat per generationem, frater enim meus, & ego ab uno descendimus patre, & filius fratris consequenter ex uno stipite communi mecum descendit, estque mihi agnatus, sed filius materteræ meæ, sive sororis meæ mihi cognatus est, non agnatus proprie, quia ex eodem communi stipite mecum descendit per generationem in linea materna, ambo enim ego & frater meus, ut & filius fratris mei descendimus ex una matre, & qui jam ex sorore matris nascitur, sive filius sive nepos, mihi & fratri meo sanguinis propinquitate conjunctus est in linea materna, estque mihi & fratri meo, ut & filio fratris cognatus. Est ergo & agnatio & cognatio consanguinitas, ut ex jam dictis patet. Porro gradus consanguinitatis dicuntur per similitudinem desumptam a gradibus scalarum vel locorum proclivium, ubi de proximo gradimur in proximum: *Estque h. l. gradus nihil aliud, quam attinentia vel habitudo personarum inter se distantium, qua cognoscitur quota agnationis vel cognationis distantia duæ personæ inter se differant, sic* v. g. ha-



v. g. habitudo distantiae inter patrem & filium, vel inter duos fratres, vel inter patrem & ejus nepotem est & dicitur gradus, quo cognoscitur quota sit inter personas sanguinis propinquitate conjunctas distantia; ratio autem supputandi gradus consanguinitatis ut recte instituatur, ante omnia constare debet de lineis. Datur enim in *consanguinitate* duplex linea, *una recta*, & *duae transverse* sive collaterales. Est autem linea *b. l.* nihil aliud, quam series personarum ab eadem stipite descendantium, qua continentur gradus, & personae juxta gradus distinguuntur, & quidem linea recta est series personarum, qua a se invicem per generationem descendunt, habentque se ut parentes & liberi, quae distingui solet in *descendentem* & *ascendentem*. *Descendens* dicitur series personarum, quae nobis superiores & parentes sunt, atque a quibus originem trahimus, v. g. Pater, filius. *Ascendens* autem linea est, quando a nobis descendimus ad eas, quae nobis superiores sunt, v. g. quando ascendo ad patrem, a patre ad avum, ab avo ad proavum &c. tunc dicitur ascendens. Una ergo quoad rem linea est, quae ascendens & descendens dicitur, easdem enim continet personas & gradus eosdem, sed quando initium sumimus ab iis, qui nobis superiores sunt, & ab his descendimus ad eos, quos genuerunt, tunc dicitur linea descendens; sed quando vice versa initium sumimus ab iis, qui geniti sunt, & hinc ad genitores ascendimus v. g. a filio ad patrem, a patre ad avum, ab avo ad proavum, a proavo ad atavum &c. hinc linea dicitur ascendens, e. g.

Thare est communis stipes.

Nahor	Abraham
Bethuel	Isaac
Laban	Jacob

Rebecca  
Juda

D 3

Porro



Porro lineæ *transversa* distinguuntur in *equales* & *inaequales*. Graduum supputandi ratio alia datur in *Jure Civili*, alia in *Jure Canonico*. Secundum *Jus Civile* est una ratio computandi gradus cum in linea recta, tum in transversis lineis, nempe I. quæ comprehenditur hac una regula: *quot sunt generationes, tot sunt gradus*. Nova generatio enim semper novum adjicit gradum. Sed juxta *Jus Canonicum* aliter instituitur graduum computatio in linea recta cum ascendente tum descendente, aliter in lineis collateralibus. In linea recta coincidit ratio computandi gradus *Juris Canonici* cum ratione computandi gradus secundum *Jus Civile*, & valet in *Jure Canonico* hæc regula: *quot sunt personæ, de quibus quæritur, intermediis computatis, una vero dempta, tot sunt gradus*. Quæ regula quoad rem idem fuit, quod juxta rationem computandi gradus in *Jure Civili* regula prædicta dicit, nempe: quot sunt generationes, tot sunt personæ; sed in lineis collateralibus ratio supputandi gradus juxta *Jus Canonicum* instituenda est in ordine & respectu ad communem stipitem & in lineis æqualibus quidem. *quoto gradu personæ, de quibus quæritur, distant a communi stipite, toto gradu distant etiam inter se*, v. g. Laban & Jacob constituuntur in lineis collateralibus æqualibus, & distant inter se in tertio gradu consanguinitatis, quia in tertio gradu uterque distat a communi stipite, nempe a Thare; nam Thare genuit Nahor, Nahor genuit Bethuelem, quæ est altera generatio & secundus gradus &c. Sed juxta *Jus Civile* Jacob & Laban distant inter se in sexto gradu, tot enim generationes intercedunt inter Labanum & Jacobum. Porro in lineis inæqualibus, *quoto gradu distat persona remotior a communi stipite, toto gradu distant inter se juxta Jus Canonicum*, v. g. Laban & Abraham distant inter se in tertio gradu lineæ inæqualis, quia tertio gradu distat



distat a communi stipite Laban tanquam persona remotior. Sciendum autem, quod in causis matrimonialibus ratio supputandi gradus instituenda veniat juxta rationem supputandi eos in Jure Canonico præscriptam.

*Affinitas proprie est personarum propinquitas proveniens ex nuptiis.* Dicitur a propositione ad, & nomine finis, ut affinitas dicatur, quod duæ cognationes diversæ interventu nuptiarum conjungantur, & altera quasi ad alterius fines accedat. Quemadmodum igitur consanguinitas fundatur in generatione, ita affinitas in nuptiis fundatur. Per nuptias enim cognati mariti affines affinitate conjunguntur uxori, & cognati vel agnati uxoris affinitate junguntur marito, ut & utriusque cognati junguntur etiam inter se affinitate.

Non autem omnis affinitas impedit matrimonium, nam cognati uxoris, & mariti cognati, licet inter se affinitate conjuncti sint, non tamen prohibentur matrimonio jungi. Hinc duo comprivigni possunt matrimonio jungi, v. g. filius patris potest novercæ suæ filiam ducere in uxorem, & duo fratres possunt duas ducere sorores, pater & filius possunt matrem & filiam ducere. Ratio reddi solet, quod per nuptias conjugēs inter se & alterius conjugis cognati vel agnati accedunt ad fines alterius conjugis, non autem utriusque conjugis cognati inter se alteri ad aliorum fines proprie accedunt, quod illustrari solet exemplo agrorum confinium, qui non se totos & ratione omnium partium affinitate se invicem contingunt, sed tantum duæ extremitates se invicem attingentes; Affinitas ergo, quæ matrimonium impedit, non est ea, quæ inter utriusque conjugis cognatos intercedit, sed quæ intercedit inter cognatos unius conjugis cum altera conjuge ejusve descendantibus, ut postea dicetur. Porro affinitatis genera solent vulgo *tria* constitui: *Primum est*, quod contrahitur per nuptias inter cognatos vel agnatos, & agnatos unius conju-



conjugis & alteram conjugem mediante una persona, v. g. Abraham fuit frater Nahoris, duxit autem conjugem Saram, jam inter Nahorem & Saram est affinitas primi generis. *Secundum* genus affinitatis est, quod contrahitur per nuptias mediantibus duabus personis, ut v. g. Si Abraham Sara demortua duxit Kethuram alteram uxorem, jam Saræ soror aut frater est affinis Kethuræ mediantibus duabus personis, nempe mediantibus nuptiis, quas contraxit Abraham semel cum Sara & rursus cum Kethura, & hic Saræ soror aut frater Kethuræ affinis est in secundo affinitatis genere. *Tertium* affinitatis genus dicitur, quod contrahitur per nuptias mediantibus tribus personis v. g. Saræ soror erat Abrahamo conjuncta in primo affinitatis genere, ob nuptias cum Sara celebratas, eadem erat affinitate conjuncta Kethuræ ob alteras nuptias, quas Abraham Sara demortua cum Kethura celebravit, jam si Kethura demortua Abraham tertiam duxisset uxorem, Soror Saræ esset tertiæ Abrahami uxori affinitate conjuncta in tertio affinitatis genere, quia mediantibus tribus personis ex interventu tertiarum nuptiarum affinitas hæc contracta est. Quamvis vero ita affinitatis genera distinguere soleant, non tamen omnia genera affinitatis, *sed tantum primum impedit matrimonium*, unde v. g. Si Abrahamo demortuo superfuerit Kethura, poterit eam Saræ frater ducere in matrimonium, non obstante affinitate, quia affinitas, quæ inter fratrem Saræ demortuæ & Kethuram, alteram Abrahami uxorem intercedit, est affinitas secundi generis, quæ frater Saræ demortuæ Kethuram attingit, non proxime per nuptias inter ipsam & suorum cognatorum quempiam immediate intercedentes, sed remote saltem ob nuptias, qui olim Saræ maritus fuit, & Kethuram intercedentes, quæ remotior affinitas conjugium inter Saræ fratrem & Kethuram impedire non potest, perinde in aliis similibus res habet.



Lineæ & gradus affinitatis proprie loquendo non dantur, sed distantia personarum ratione affinitatis æstimatur ad modum distantiae personarum ratione consanguinitatis, nempe affinitas fundatur in nuptiis, per quas duo conjuges transeunt in unam carnem, etiam consanguinei conjugis utriusque affinitate junguntur alterutri conjugi, eo gradu eaque linea, qua consanguinei alterius conjugis conjugi sunt conjuncti v. g. Rebecca est Labani fratri suo consanguinitate juncta in primo gradu lineæ collateralis; Rebecca autem nupsit Isaaco & transiit cum ipso in unam carnem, hinc Laban, qui consanguinitate Rebeckæ conjunctus est in primo gradu lineæ collateralis, etiam Isaaco conjunctus est affinitate in primo gradu lineæ collateralis. Porro Laban genuit Leam, & genuit etiam Rahelem duas filias, Isaac genuit Jacobum, jam Lea est Isaaco affinitate conjuncta in secundo gradu lineæ collateralis, & Rahel similiter est Jacobo conjuncta in secundo gradu affinitatis lineæ collateralis. Ratio est, quia Lea & Rahel Rebeckæ matri Jacobi consanguinitate conjunctæ sunt in secundo gradu lineæ collateralis, & quemadmodum Jacob & Lea uterque a communi stipite æqualiter distat, Lea scilicet a Labano fratre Rebeckæ, & Jacob ab Isaaco marito Rebeckæ, ideo Lea & Jacob, ut & Rahel & Jacob distant in secundo affinitatis gradu lineæ æqualis, sed v. g. Lea vel Rahel, filia Labanis & Isaaco marito Rebeckæ distant in secundo affinitatis lineæ inæqualis. Ratio est, quia Isaac & Laban parens Lea & Rahelis distant in primo affinitatis gradu, Lea autem, ut & Rahel in secundo ab Isaaco distant gradu. Quemadmodum autem in consanguinitate, quo gradu persona remotior distat a communi stipite, eo gradu per se personæ inter se, de quibus agitur, in lineis quidem collateralibus in æqualibus, ita & in affinitate quoto gradu persona remotior distat ab altera in linea inæquali, eo distant ipsæ inter



rer se, & ita in coëteris res habet. Quod attinet ad lineas collaterales e. g. in linea recta sit maritus & uxor, quæ personæ transeunt in unam carnem, uxor autem ex priori marito in primo gradu lineæ rectæ: ratio est, quia filia uxoris matris suæ consanguinitate conjuncta est in primo consanguinitatis gradu lineæ rectæ, & quia mater ejus cum altero marito per nuptias transit in unam carnem, etiam filia ejus quæ est privigna alterius mariti, affinitate conjungitur cum vitrico in linea recta gradu primo affinitatis; jam porro neptis vel filia ex privigna conjungitur vitrico, sive aviæ marito affinitate itidem in linea recta & quidem in secundo gradu affinitatis, quia neptis uxoris ejus, aviæ suæ consanguinitate conjungitur in linea recta gradu secundo consanguinitatis. Ergo & marito aviæ suæ eadem affinitate conjungitur in linea recta, gradu secundo affinitatis, & sic in coëteris res habet, manetque, quod diximus, *proprie loquendo affinitatis nullas dari lineas, gradus nullos, estimari tamen distantiam personarum ratione affinitatis ex distantia personarum ratione consanguinitatis, quibus ob intervenientes nuptias affinitate conjunguntur.* In consanguinitate enim proprie dantur gradus.

Quod attinet ad Leges Levitici XVIII. comprehensas & hactenus declaratas, prohibentur illis in affinitate primo nuptiæ *privigni cum noverca*, qui est primus affinitatis gradus lineæ rectæ ascendente, nam noverca transit per nuptias in unam carnem, privignus novercæ autem est filius mariti novercæ, & marito ejus conjunctus in primo consanguinitatis gradu lineæ rectæ ascendente, ergo & privignus novercæ, novercæ suæ affinitate conjunctus est in linea recta ascendente gradu primo, quo gradu enim filius consanguinitate propinquus est patri suo, eo gradu & in linea etiam illa affinitate conjunctus censetur novercæ suæ. Deinde prohibentur etiam nuptiæ inter *socerum & nurum ejus, sive inter uxorem filii*



*filii & patrem filii vers. 15.* est autem nurus socero suo affinitate conjuncta in primo gradu lineæ rectæ descendentis, ratio est, quia maritus nurus est socero ejus consanguinitate conjunctus gradu primæ lineæ rectæ ascendentis. Est enim filius Soceri. Tertio prohibentur etiam nuptiæ *inter fratrem mariti defuncti & ejus viduam*, quam fratriam vocant *vers. 16.* quæ est affinitas in gradu primo lineæ collateralis, ratio est, quia duo fratres consanguinitate sibi conjuncti sunt in gradu primo lineæ collateralis, ergo & frater defuncti fratris, atque uxor ejus relicta sive fratria affinitate sibi conjunguntur, primo gradu affinitatis, lineæ collateralis. Quarto prohibentur etiam nuptiæ *inter vitricum & privignam vel neptem ex privigno vel privigna vers. 17.* qui est primus vel secundus affinitatis gradus, nam privigna jungitur vitrico suo primo affinitatis gradu lineæ rectæ, ejus autem filia eidem jungitur secundo affinitatis gradu lineæ rectæ. Ratio est, quia privigna vitrici distat a matre sua, quæ per nuptias transit cum vitrico in unam carnem, primo consanguinitatis gradu in linea recta, & filia privignæ vel privigni ab avia sua distat in secundo consanguinitatis gradu lineæ rectæ, ergo & privigna distat a vitrico suo primo affinitatis gradu, & filia privignæ distat ab eodem in secundo affinitatis gradu lineæ rectæ. Quinto prohibetur etiam *ne quis patru sui uxorem sive amitam suam ducat. v. 14.* qui est affinitatis gradus secundus lineæ collateralis inæqualis. Ratio est, quia patruus a filio fratris distat in secundo consanguinitatis gradu lineæ collateralis inæqualis, nam pater & frater ejus, sive patruus distant inter se in gradu primo, & filius patris rursus a patre distat uno gradu, a communi stipite autem sive avo duobus gradibus: Ergo & uxor patru distat a filio fratris mariti in secundo affinitatis gradu lineæ collateralis inæqualis. Sexto prohibetur etiam *ne quis uxoris sue sororem ducat, v. 18.* qui



est primus affinitatis gradus lineæ collateralis. Ratio est, quia uxor & soror ejus sibi invicem conjunctæ sunt primo consanguinitatis gradu lineæ collateralis, ergo & maritus uxoris atque soror uxoris primo affinitatis gradu sibi, & quidem lineæ collateralis invicem conjunctæ sunt. Hi gradus expressi sunt *Levitic. XVIII.*

Ratione consanguinitatis prohibentur nuptiæ primo *inter filiam & patrem, ut & inter filium & matrem v. 7.* quæ personæ in primo consanguinitatis gradu lineæ rectæ ascendentes sibi invicem conjunctæ sunt. Ratio est, quia in linea recta, quot sunt generationes, tot sunt gradus, sed inter filiam & patrem ejus ut & inter filium & matrem ejus una tantum intercedit generatio; Ergo filia distat a patre & filius a matre uno tantum gradu. Deinde prohibentur etiam nuptiæ *inter fratrem & sororem cum germanam tum uterinam v. 9.* quæ personæ etiam primo consanguinitatis gradu sibi invicem conjunctæ sunt, sed lineæ collateralis, ratio est, quia frater & soror non ducunt a se invicem originem per generationem, sed ambo ducunt originem ab uno communi stipite, uno scilicet parente, sive patre, sive matre, sive patre & matre simul; Ergo consanguinei sunt in linea collateralis, & quia a communi stipite utraque persona uno distat tantum gradu, ideo etiam uno consanguinitatis gradu personæ duæ in lineis collateralibus distant a communi stipite eo gradu distant etiam inter se. Tertio prohibentur etiam nuptiæ *inter avum & neptem ejus, sive ex filio sive ex filia v. 10.* Quæ personæ distant in secundo consanguinitatis gradu lineæ rectæ descendentes. Ratio est, quia neptis descendit per generationem ab avo non quidem immediate, sed mediante ejus filio aut filia, quæ autem personæ habent se ut generans & genita, illæ sunt consanguineæ in linea recta, & quia inter avum & neptem ejus duæ interveniunt generationes, neptis autem



autem genita est a patre suo, vel ex matre sua, & pater aut mater ejus genitus vel genita est ab avo, quot autem sunt generationes tot sunt gradus in linea recta. Quarto prohibentur etiam speciatim *nuptiæ inter fratrem & sororem uterinam*, v. 11. juxta communio rem sententiam, quæ personæ rursus in consanguinitatis primo gradu sibi invicem sunt conjunctæ, sed in lineis collateralibus ob rationem jam allatam cum de prohibitione nuptiarum inter patrem & sororem ageremus. Quinto prohibetur etiam *ne quis ducat sororem patris sui sive amitam suam*, v. 12. qui rursus est consanguinitatis gradus secundus lineæ collateralis inæqualis. Ratio est, quia filius patris & soror patris a communi stipite distant in secundo gradu, nam licet soror patris uno tantum gradu distet a communi stipite suo, & fratris sui parente, quia tamen filius patris tanquam pars in altera linea collateralis tanquam remotior pars a communi stipite duobus distat gradibus, ideo etiam filius patris & soror patris in secundo consanguinitatis gradu lineæ inæqualis distant juxta regulam Juris Canonici *quo gradu consanguinitatis persona remotior a communi stipite distat, eo gradu distant inter se personæ, de quarum consanguinitate quæritur*. Sexto prohibetur etiam, *ne quis materteram suam sive sororem matris suæ ducat in uxorem*, v. 13. qui rursus est secundus consanguinitatis gradus lineæ collateralis inæqualis ob rationem jam adductam, quamvis enim matertera, quæ cum matre in linea collateralis constituitur, a communi stipite uno tantum gradu distet, filius tamen matris in altera linea distat a communi stipite duobus gradibus, in linea collateralis autem inæquali militat regula, jam adducta, quo gradu persona remotior distat a communi stipite, eo gradu distant etiam personæ inter se, de quarum distantia quæritur. Septimo prohibetur etiam, *ne filia patris nubat fratri patris, sive patruo suo*, vers. 14. qui



rursum est consanguinitatis gradus secundus lineæ collateralis inæqualis, ob rationem jam adductam, quia filia patris distat a communi stipite duobus consanguinitatis gradibus; Ergo distat etiam a patruo suo, qui in altera linea collateralis constituitur duobus gradibus non obstante, quod patruus uno tantum gradu a communi stipite distet. Atque hi sunt consanguinitatis & affinitatis gradus, qui *Levit. XVIII. nominatim & expresse* prohibentur. Vtrum vero hi soli in gradibus lege divina prohibitis habendi sunt, an vero pari ratione per analogiam & per consequentiam prohibiti dicendi sint alii omnes gradus quorum par est distantia & habitudo, licet personæ distantes hic nominatim non sint expressæ, illud vero est, quod in quæstionem & controversiam venit.

Posterius Theologi affirmant communiter, docentque legibus *Leviticæ XVIII.* comprehensis non tantum prohiberi nuptias inter personas quæ nominatim exprimuntur, sed etiam inter personas alias quasvis, quarum par ratio distantiae est, sive quæ iisdem consanguinitatis sive affinitatis gradibus sibi invicem conjunctæ sunt. Nituntur autem *primum* ratione ex *Levit. XVIII. v. 6.* petita, quæ est: *Nemo quisquam ad ullam propinquam carnis suæ appropinquet ad revelandum nuditatem ejus.* Verba in textu Hebræo ad literam habent *vir vir* h. e. quilibet *ad omnem carnem carnis suæ non appropinquabit*, ne appropinquato ad retegendam nuditatem ejus, quæ verba continent fundamentum generale omnium prohibitionum specialium, nempe quia non licet appropinquare ad carnem carnis suæ, h. e. ad ullam consanguinitate sibi proxime conjunctam, ideo non licet v. g. patri ut ducat in uxorem filiam, aut matri, ut nubat filio, inter quas ergo personas datur propinquitas carnis, sive proxima consanguinitas, illæ utique vi hujus legis generalis prohibentur matrimonio jungi, licet expresse legibus specialibus non sint



sint prohibita. Quamvis vero fundamentum hoc generale vi verborum pertineat ad personas consanguinitate sibi proxime junctas, consequenter tamen recte transfertur etiam ad personas affinitate sibi conjunctas, ut, quæ Personæ ob consanguinitatem prohibentur inire matrimonium, illæ etiam in affinitate, si gradibus iisdem distent, prohibita recte censeantur, ut patet inductione exemplorum: nam sicuti vi hujus fundamenti generalis v. 7. prohibetur filia, ne cum patre ineat matrimonium, & filius ne cum matre matrimonium ineat ob consanguinitatem proximam, ita v. 8. prohibetur, ne privignus cum noverca ineat matrimonium, quod eodem affinitatis gradu personæ hæ sibi invicem conjunctæ sint, quo filius & mater ratione consanguinitatis sibi sunt conjuncti, & ita in cæteris. Vbicunque ergo ea datur personarum habitudo, ut altera ad alteram ut caro carnis suæ se habeat, vel ratione affinitatis altera ad alteram eodem gradu se habeat, qua ratione consanguinitatis sese duæ personæ habent, quarum altera est caro carnis alterius, eæ de jure divino prohibita censeantur, siue exprimantur in legibus specialibus siue non exprimantur. *Secundo* urgent, quod inter quas personas par habitudo est, inter eas etiam valeat jus, eademque prohibitio, sed personæ inter quas par est habitudo, & eadem graduum distantia, siue ratione consanguinitatis, siue ratione affinitatis, illæ etiam matrimonio jungi pariter prohiberi æstimandæ sunt, siue expresse prohibeantur, siue non. Vbi enim eadem legis ratio est, ibi lex eadem & jus idem militat. *Tertio* idem probant ex consequente absurdo. Si enim personæ tantum illæ quarum expresse mentio fit *Levit. XVIII.* prohibentur matrimonium inire, non autem aliæ, quarum par ad se invicem est habitudo, sequeretur quod in linea recta concedendæ sint nuptiæ inter nepotem & aviam, hæ enim personæ in citato *Levit. XVIII.* capite non expresse prohibentur matrimo-

nium



nium inire: concedendæ etiam essent nuptiæ inter avum & proneptem, harum enim etiam personarum nulla fit expressa mentio in citato *cap. XVIII. Lev.* Similiter ratione affinitatis in linea recta concedendæ essent nuptiæ inter privignum & novercam, nam hæ etiam personæ non prohibentur expresse matrimonio jungi, sed nuptias hæc esse de jure divino & naturali concessas nemo dixerit, sed contra in linea recta tum ascendente tum descendente admittitur ab omnibus regula receptissima, quod nuptiæ in hac quidem linea prohibeantur in infinitum, similiter in lineis collateralibus concedendæ essent nuptiæ inter fratrem & sororem germanam, inter filiam sororis & avunculum, cum hæ etiam personæ non expresse prohibeantur matrimonio jungi.

Oppositam tamen sententiam amplectuntur *Judei*, & ex parte etiam inter Christianos *Pontificii*, ac *nonnulli alii*, rationes quibus nituntur potiores sunt: *Primo* quod Moysis tempore graduum consanguinitatis & affinitatis computatio, quæ hodie in usu est, fuerit ignota, non ergo vero consentaneum videtur, Moysen vel Deum per Moysen leges hæc prohibitorias ferentem respexisse ad paritatem graduum, sed contra potius vero consentaneum videtur Deum voluisse prohibitas nuptias inter personas expresse positas, & inter alias non expressas voluisse nuptias esse permissas. *Secundo*, quia in *cap. XVIII. Lev.* exprimuntur prohibenturque expresse quædam personæ matrimonio jungi, quæ jam ante per Analogiam prohibitæ fuerunt ob paritatem graduum inter eas intercedentium, v. g. prohibetur expresse, ne quis ducat uxoris sororem, & prohibetur etiam, ne quis ducat fratrem suam, sive fratris sui demortui viduam relictam; si autem Deus in legibus hisce præcise respexisset ad gradus affinitatis, non ad personas tantum, tunc nihil opus fuisset duplici lege, sed sufficere potuisset, si prohibitæ fuissent nuptiæ vel inter fratrem



fratrem ac fratriam vel inter maritum & uxoris sororem, cum sub una prohibitione implicite & per analogiam etiam altera contineatur. Sic prohibetur etiam expresse, ne quis ducat in uxorem amitam suam, sive sororem matris suæ, ubi cum par sit habitudo consanguinitatis, rursus nil opus fuisset duplici prohibitione, si præcise ad habitudinem personarum & gradus consanguinitatis, non autem ad personas tantum Deus respexisset, sub alterutra enim prohibitione contineretur altera implicite, & nihil opus fuerit altera prohibitionem expressa.

Sane posterior sententia ita nude & crude admittenda esse non videtur, sed contra statuendum esse existimamus, leges *Levit. XVIII.* comprehensas porrigere sese longius, quam ad eas personas, quæ nominatim iis expressæ sunt, & prohiberi per analogiam etiam quasdam alias personas nominatim non expressas, iisdem tamen gradibus inter se distantes, matrimonio jungi, idque evincunt exempla ad confirmationem sententiæ prioris adducta, v. g. nuptiæ inter nepotem & aviam, & inter avum & proneptem citra dubium de Jure Naturæ prohibitæ sunt, & in *Lev. cap. XVIII. v. 7. & 10.* haud dubie implicite prohibentur, dum prohibetur ne patris sui nuditatem filia, aut matris suæ nuditatem filius, vel neptis suæ nuditatem avus retegat. Est enim par prohibitionis ratio. Vt enim filia patris, & filius matris nuditatem retegere prohibetur ob propinquitatem sanguinis & hinc natam reverentiam, quam liberi parentibus debent, ita avus & neptis non tantum sed etiam, proneptis nuditatem retegere prohibetur, cum proneptis nuditas æque sit nuditas proavi, atque neptis nuditas avi nuditas est, & utrobique naturalis verecundia & pudor commixtionem prohibeat. Perinde res habet cum privigno & sua noverca ac pronoverca; quia enim noverca per nuptias cum patre privigni in unam coaluit carnem, na-

F

turalis



turalis reverentia, quam debet privignus novercæ ob conjunctionem cum patre in unam carnem, commixtionem prohibet, ita prohibet etiam inter privignum & pronovercam, cui parem debet reverentiam ob propinquitatem sanguinis cum noverca proximam. Et quemadmodum *vers. 14. cap. XVIII. Lev.* prohibentur nuptiæ inter filiam patris & fratrem ejus, sive avunculum illius ob sanguinis propinquitatem, ita implicate & per analogiam simul prohibentur nuptiæ inter filiam fororis & avunculum, sive fratrem matris ejus, est enim non tantum æqualis personarum distantia, & par consanguinitatis ratio, sed etiam par ratio prohibitionis. Vt enim frater patris mei sorori meæ æque ac mihi loco parentis est, ita naturalis verecundia & reverentia, quam Soror mea parentis fratri debet, prohibet commixtionem cum illo, & simpliciter sororis filia matris meæ vel patris mei eandem debet reverentiam fratri ejus, & prohibet similiter sanguinis propinquitas, & hinc naturalis reverentia ac verecundia prohibet inter has etiam personas carnalem commixtionem. Nec obstat, quod ratio computandi gradus cum consanguinitatis tum affinitatis, quæ hodie in usu est, Moyſis tempore forſan in usu aut cognita non fuerit, ipſæ res tamen, nempe naturalis personarum propinquitas, ſive in generatione, ſive in nuptiis fundata, extitit, & lumine naturæ edocti ſunt homines omni tempore inter quas perſonas par vel diſpar ſit conſanguinitatis aut affinitatis ratio, aut habitudo, v.g. in conſanguinitate eandem eſſe rationem conſanguinitatis inter filiam meam & fratrem meum, quæ eſt inter filium meum & ſororem meam, & contra eandem eſſe habitudinem & propinquitatem ſanguinis inter filiam ſororis meæ & me, aut inter filium ſororis meæ & aliam meam ſororem, unde ibi cognitum fuit, nuptias de Jure divino eſſe prohibitas, v. g. inter fratrem & fratris filiam, hoc ipſo noſſe potuit, quod prohibitiæ ſint nuptiæ inter ſororem



rem & fratris filium, præsertim cum ipsa natura insita verecundia non minus ab una commixtione abhorrere faciat, quam ab altera, unde ratio supputandi gradus consanguinitatis non tantum in naturali generatione fundata est, sed etiam naturæ lumen facem quasi præfert ad eos numerandos & computandos. Hinc videmus quod apud gentiles etiam solo luminis naturæ ductu ejusmodi commixtiones carnales fuerint prohibitæ, ut patet exemplo Juris Civilis, in quo iidem gradus consanguinitatis, quos lex Mosaica prohibet prohibentur. Alia specialia exempla apud varias gentes apud Gerhardum & alios producta inveniuntur.

Neque secundo obstat, quod *cap. XVIII. Lev.* personæ quædam matrimonium inire expresse prohibentur, quarum commixtio, jam ante per analogiam prohibita fuit, hoc enim certis de causis bene potuit fieri, ut tamen aliæ personæ nominatim non expressæ in aliis legibus per analogiam & implicite prohibeantur. Quod enim quarundam personarum conjunctio carnalis, quæ jam ante per analogiam prohibita fuerat, etiam expresse prohibetur, causa esse potuit (1.) major perspicuitas, ut omnis obscuritas aut ratio dubitandi removeretur, potuerunt etiam quædam speciales subesse causæ, vel (2.) quod talia matrimonia sive apud Israelitas, sive apud Cananæos fuerint in usu, & ne in consequentiam traherentur, expressa prohibitionem indigerent, v. g. Loti filiæ concubuerunt cum patre, quæ commixtio ne forte a quopiam in exemplum traheretur, prohibenda expresse fuit, non obstante, quod jam implicite etiam, & per analogiam prohibita sit in nuptiis inter filium & matrem prohibitis.

Vtrum vero omnes plane æqualiter distantes gradus per analogiam prohibiti sint legibus *Lev. XVIII.* comprehensis, dubitari a quibusdam solet; quamvis enim in *v. 6.* citati *cap. XVIII. Lev.* fundamentum prohibitionis generale constituitur



fluatur in propinquitate carnis, videtur tamen esse id intelligendum de propinquitate, quæ naturalem quandam verecundiam & pudorem a commixtione carnali suapte natura abhorrentem inducit, cujusmodi est in linea recta inter parentes & liberos illorum, & qui illis in linea ascendente & descendente conjuncti sunt, & in collateralis linea inter fratrem & sororem, & inter avunculum & sororis filiam, vel inter sororem & fratris filium intercedere concedi solet, in affinitate etiam conceditur, talem esse propinquitatem inter novercam & privignum, pronovercam & privigni filium, item in linea collateralis inter fratrem & fratris uxorem, sive viduam relictam, inter viduam & uxoris demortuæ sororem, quamvis de his ultimis affinitatis gradibus etiam nonnulli disputent, & in contrariam abeant sententiam, utut nuptiæ inter fratrem & fratris uxorem cap. XVIII. Lev. expresse prohibitæ sint. Sunt tamen, qui legem hanc non moralem, sed positivam esse contendunt.

In linea autem collateralis inæquali affinitatem nuptias nec de Jure divino, nec de Jure naturæ impedire, nonnulli existimant; utut enim uxoris demortuæ sororem, aut fratris demortui viduam ducere contra naturalem verecundiam sit, ob consanguinitatem proximam, quæ inter uxorem, cum qua in unam coaluisti carnem ejusque sororem, & inter fratrem tuum cum quo uxor ejus una caro facta est, & te intercedit, non tamen par ratio esse putatur sororis filiæ aut neptis uxoris tuæ, aut filiæ uxoris fratris aut neptis ejus, cum hæc affinitas videatur esse remotior, quam quæ suapte natura verecundiam a nuptiis abhorrentem inducere possit, unde existimant de Jure divino & naturæ licere, ut quis filiam aut neptem ex sorore uxoris suæ aut ex fratre ejus ducat, vel ut quæpiam marito sororis maternæ aut fraternæ nubat, cum nec expresse id prohibitum sit in Jure divino, neque etiam implicite & per analogiam, cum tanta uti dictum, propinquitas personarum non sit, ut suapte natura verecundiam a nuptiis abhorrentem inducere possit.

Alii tamen contrarium defendunt, & dicunt esse in his etiam gradibus parem affinitatis & consanguinitatis rationem. Intercedit enim hic etiam parentum & liberorum respectus quidam, qui naturæ verecundiam a commixtione carnali abhorrentem inducere videtur, quemadmodum enim filia patris tui aut sororis tuæ loco parentis est ob consanguinitatem, cum proxime distes a communis stipite, ex quo & frater tuus, & soror tua orti estis, ita filia uxoris tuæ es loco parentis ob conjunctionem cum uxore tua in carnem unam, quæ ei (nempe filia uxoris) pari ratione matris loco fuit ob consanguinitatem, qua tu filia sororis aut filia fratris tui loco parentis es.

Res sane difficilis est, & utraque sententia suos habet propugnatores, posterior tamen Theologis communiter recepta est, quam etiam praxis communis Ecclesiarum nostrarum, quæ nihil discriminis inter consanguineos & affines hoc quidem in passu vulgo vel communiter admittere solet, unde cum res integra adhuc est, videtur tutius esse, ut personis in prædicto affinitatis gradu sibi conjunctis nuptiæ non permittantur, quod si vero contigerit, ut tales consumantur nuptiæ, existimamus (quanquam & hic alii notæ non infimæ viri aliter sentiant) consummatas non esse ob prædictam propinquitatis affinitatem dissolvendas, non enim prohibitiones omnes uti nuptias contrahere impediunt, ita contractas & consummatas non statim dissolvunt: Suntque rationes in promptu, quæ tale conjugium, ubi consummatum fuerit, dissolvendum non esse shadeant, utut contrahendum impediri posse, concedatur, qua de re alibi.